

德縣志

纂修 民國二十四年

72199
:10

卷十
人物志
大儒
耆英

—EM140.149
92
部三:10

德縣志卷十

人物志

大儒 者英 忠義 孝行 齒德 文職 武職 封贈
思蔭 保舉 孝廉方正 者民 優行獎勵

互海文書
同文書
圖書

先儒董子生值秦漢時代申韓蘇張之徒各執所學以相抗衡天
下之學申韓者流於刑名學蘇張者流於遊說瓦缶爭鳴金石沉
響惟我董子獨曰正其誼不謀其利明其道不計其功大哉斯言
承洙泗之心源衍天人之道脈精微唯一由堯舜禹湯文武周公
孔子莫非此道之相傳於不替也孔子而後厥為孟子孟子而後
董子一人而已我德為董子故里望昌平之未遠梓里雲連溯江
漢以朝宗薪傳星聚後之學者素習其言深慕其道景行惟賢亦
克念而作聖彼夫耆年大德英望令名足以守先待後者曰耆英
忠心貫日義氣凌雲足以保國衛民者曰忠義孝稟於天行能動
物足以不匱錫類者曰孝行引年貽典矜式垂型足以輔世長民
者曰齒德得聖賢之具體望重一時名垂千古皆足媲美於董子
安敢不歷為表著樹作人倫之鑑哉

德縣志

卷十

人物志

德縣志卷十

人物志 大儒

耆英

大儒

漢

董仲舒廣川人也少治春秋孝景時爲博士下帷講誦三年不窺園
學士皆師尊之武帝卽位舉賢良文學之士仲舒以賢良對策天
子覽而異焉以爲江都相事易王易王素驕仲舒以禮誼匡正王
敬重焉中廢爲中大夫仲舒爲人廉直以公孫弘爲從諛弘嫉之
言於上使爲膠西王相膠西王尤縱恣聞仲舒大儒善待之凡相
兩國事驕王數上疏諫爭教令國中而治及病免家居不問
產業以著書爲事朝廷有大議使使者就其家而問之後以壽終

德縣志

卷十

人物志

大儒

二

徙家茂陵子孫皆以學至大官仲舒所著皆推明孔子抑黜百家
上書條教凡百二十三篇所說春秋玉杯繁露清明竹林之屬皆
傳於世

漢

東方朔字曼倩平原厭次人也少失父母養依侍兄嫂十三學書三冬文史足用十五學擊劍十六學詩書誦二十萬言十九學孫吳兵法戰陣之具鉦鼓之教常服子路之爲人年二十二長九尺三寸目若懸珠齒若編貝勇若孟賁捷若慶忌廉若鮑叔信若尾生儼然大臣之表武帝卽位召選天下文學才智之士簡拔其俊異者用之時與司馬相如等並在左右每與大臣辯論中外相應以義理之文大臣數屈焉相如特以辭賦得幸朔因不服持論好談諧上以俳優蓄之時常直諫補益朝政上躓之令待詔公車奉祿微簿未得省見上好微行以夜漏下十刻迺出稱平陽侯旦明入

德縣志卷十

人物志

耆英

三

山下馳射鹿豕狐兔等類馳騫於秔稻之間民怨詈之幾爲郢杜令所阨吾邱壽王奏事上悅稱善朔在傍以正論進諫並陳秦階六符以觀天變上省乃拜朔爲大中大夫給事中賜黃金百觔朔每遇事雖談笑間亦寓規諫之意公卿在位皆數弄無所爲屈因著論設客難已用位必亦自慰論又設非有先生之論朔之文辭此二論最善其餘有封泰山責和氏璧皇太子生謀屏風殿上柏柱平樂觀賦獵八言七言上下從公孫弘借車凡劉向所錄朔書具是矣彼世人以其神異莫測稱之爲仙也久矣或曰儒也非仙也雖誌列載籍而未遑深考其儒則辭論世傳而確有可信要之仙固靈應足以庇四民而儒更德藻可以風多士史稱先生以直言敢諫補益朝政擬與龍逢比干之亞其庶幾近乎若褚少孫補

滑稽傳豈篤論也哉

南齊

劉懷珍字道玉陵縣人漢膠東康王寄之後也其先劉植爲平原太守因家焉幼隨祖奉伯至壽陽豫州刺史趙伯符出獵百姓聚觀懷珍獨避不視奉伯異之後爲驃騎長史累官至光祿大夫卒諡敬侯

劉懷慰字彥恭懷珍從弟也父乘仁爲冀州刺史死於義懷慰持喪不食醯醬冬月不用絮衣仕宋爲尙書別駕郎齊國建高帝置齊郡於瓜步以懷慰爲護國將軍齊郡太守修城郭墾廢田決沈湖不受饋遺既卒明帝謂僕射徐孝嗣曰劉懷慰若在朝廷不患無青史也

德縣志

卷十

人物志 耆英

四

唐

高 馮字季輔平原人貞觀初遷中書舍人太宗賜以鍾乳粉曰汝進藥石之言朕以藥石相報遷吏部侍郎善叙人物帝賜以金背鏡以况精鑿遷中書令進爵蓀國公諡曰憲

高 沐渤海人馮之後貞元中進士以家託鄆故李師古辟屬判官師道據十二州叛沐引古今成敗勸說不能入斥守濮州沐乃上書誇山東煮海之饒師道之謀悉露遂怒殺之及師道平贈沐吏部尙書

孟 簡字幾道德州人工詞尙節義舉進士宏詞累遷倉部員外以不附王叔文見疾徙爲它曹元和中拜諫議大夫知匭事韓太韓暉之復刺史吐突承瓘爲招討使簡皆固爭詣延英言不可狀以

惓切出爲常州刺史境有孟瀆久淤闕簡治導漑田凡四千頃以勞賜金紫召爲給事中拜爲工部侍郎未幾出爲山南道節度使被劾左遷太子賓客卒

宋

張 雍字口口德州安德縣人治毛詩開寶六年中第釋褐東關尉改將作監丞知南雄州遷太子右贊善大夫知開封府司錄參軍俄爲秘書丞充推官以誣坐王元吉毒母獄免官維熙初復原官進御史臺推官端拱初累遷太府少卿加諫議大夫出爲西川轉運使知梓州蜀寇王小波李順作亂圍梓州雍嬰城固守設智屢摧敵鋒八十日圍始解上手詔褒美擢給事中改工部侍郎轉禮戶兵三部侍郎歟歷中外大中祥符元年請老以尙書右丞致仕

德縣志

卷十

人物志

耆英

五

年七十卒雍姿貌魯樸始登科爲滕中正壻中正諸子咸笑之中正曰此人異日必顯達壽考非汝等所及也後中正諸子官不越郎署亦無耆年如其言云

元

孟 泌德州人登至順間進士官至翰林檢討

按金志人物列傳王志謂所載高詡等十七人牽引失當汰其傳而存其名逐一辨駁嗣李東園先生著州志考異力詆王志之誤謂東方朔劉懷珍劉懷慰高馮高沐孟簡張雍孟泌等八人已秩祀典後人不得刪易且謂古來史書於人之里居或舉郡名或舉縣名曰平原者亦不敢必其爲郡爲縣此地在漢爲平原屬邑在隋唐爲德州屬邑德州治東方朔爲平原厭次人

厭次之地邑境有之劉懷珍劉懷慰其先人劉植爲平原太守因家焉其非僑置可知高馮平原人唐之平原卽德州孟簡德州平昌人張雍孟泌德州安德人兩縣均屬德州錄之不爲不當惟高沐渤海人金志採列雖有未合然爲馮之後裔且已久秩祀典亦不得率爾更易是以此次修志謹將載在祀典鐫諸碑碣者咸依金志叙列其禮震高詡管輅華軼劉歆明山賓司徒陸麗張買奴單煦等九人以不載祀典故不復及云

明

宋 性洪武中以貢入國學嘗代所知草疏上奇其文召見除刑部主事治獄多平反署本部右侍郎出爲湖廣按察司副使調陝西永樂初陞四川右參政監採馬湖大木山谿紆阻所需工費億萬

德縣志

卷十

人物志 耆英

六

土人憂不堪命性禱於天水忽暴至木自岫中漂出土人驚爲神建祠祀之進行在刑部右侍郎隨征北至捉虎山饋餉乏匱謀合廟算加尙書俸賜裹蹄金二錠所至號爲廉能因病告歸被讒抄沒家無餘資惟裹蹄金在焉上知其廉賜地十頃免其租並闔戶差徭仍復其官竟辭不起成化間詔祀學宮嘗佐夏原吉治水浚白茆塘劉家河大黃浦蘇松農田大利載明史夏原吉傳子於少穎敏或示名臣奏議百餘首讀之輒焚其稿或駭愕於默抄不差一字足跡不入州府隱居終身以恬淡稱

王復善大都人元代進士避亂德水遂家焉洪武中以明經聘爲濟南府學訓導陞大名縣學教諭分校秋闈者四庚午山東癸酉北平丙子河南己卯復北平號稱得士永樂二年告老賜璽書褒之

卒於家

劉撝謙洪武甲戌進士是德州進士第一人張海科第題名記所謂破天荒遂以節義文章名天下者爲撝謙言也官至知府其事蹟雖不可考而張海推重若此劉盛從學受經遂成碩儒

劉盛字宗茂原籍江西贛縣遊學寓德州初受經於鄉先生劉撝謙苦志力學成碩儒質樸淡泊隱居不仕自號無辯野人其門弟子登科甲者相繼二子皆中鄉式長子羽瑞州府通判次子恩蘭谿縣知縣有書說遺稿并詩集行於世

鮑雲鳳少以奇童稱精究百家以至天文地理推驗如神隱居終身不仕號曰雲峯先生子璉中景泰庚午鄉式亦不仕

張惠永樂甲午舉人任監察御史巡按雲南有御史張善以蛇妖

德縣志

卷十

人物志

耆英

七

病臥池口驛惠往視留治湯藥頃之妖蛇挾風雨至惠射之風雨止而蛇匿於樹命胥吏樹下焚之良久蛇墜善病乃已過沅陵見居民延燒數百家詢知爲惡鳥啣火所致惠設機弩驅之惡鳥投死於江惠能驅除民害其功媿神禹矣奉詔招安諸蠻按浙江處州民聚爲盜惠皆撫安之拜禮部尙書天順三年卒於官惠初舉於鄉卽葬其族墓之暴露者已貴歸里必謁先師廟至墓親持鍤修治居墓次席地而食嘗言曰吾祖父在地下吾安忍享人生奉養乎其至性如此

石倫景泰庚午舉人授無極知縣邑多逃徙倫招來撫字歸者以千計賑貧興學無極大治陞沂州知州尋卒

焦顯景泰甲戌進士授湖廣道監察御史巡視紫荆等關威名大

著按四川番賊出沒顯布宣恩威地方以靖委勘皇莊悉以其田歸原主貴戚憚之後以言事過激降紅城子驛丞都御史馬文升薦之歷升彰德府知府

郁 綸字理之景泰甲戌進士知崇德縣明敏有稱時官署久廢綸自學校壇壝以及河渠街巷市肆悉規畫經理教育生徒授以禮儀程式士論翕然大盜章正等爲患地方智設方略以擒之民慶安堵性剛直不能脂韋忤當路罷官邑人以爲恨事

張 賓天順丁丑進士爲監察御史成化四年慈懿太后崩將別葬魏元偕同官三十九人康永韶偕同官四十一人伏哭文華門時御史中有畏縮不前者賓叱之曰君等獨不受國恩耶何爲首鼠兩端乃同往力諫忠義所感足以起懦後官至右布政

德縣志

卷十

人物志 耆英

八

張 海字文淵天順己卯鄉試第一丙戌進士爲吏科都給事中豪邁有氣節陞順天府丞時汪直用事海以公事往見不屈出知雲南鶴慶府累陞兵部侍郎賜璽書命往經略哈密海條上六事至甘州遣使賚勅諭阿哈瑪特歸陝巴不從上疏遠方不可加兵來則撫之去則拒絕之而已修嘉峪關捕通阿哈瑪特回彝數十人分別誅遣遂全師還上以其無成下之獄降山西參政踰年卒有詩稿藏於家

鄒 祥成化辛丑進士初授南宮知縣時尙嚴刻祥獨寬厚陞高郵知州州多富豪吏舞文法祥訪爲民害者數人置之法境內肅然陞戶部員外奉勅收上新河淮安料鈔釐革夙弊陞郎中謝病歸不復出

按鄒祥宋中書令鄒熹後裔也徽宗賜一門四傑圖其一爲道充鄒衍其二爲龍圖閣待制鄒浩其三爲參知政事鄒柄其四爲太師道明鄒熹各有勅贊圖後有謝枋得文天祥贊爲鄒氏世寶明初自文登遷德三世至祥其圖存於祥之五世孫述魯謹守之

趙 淮以書算充布政司都吏役滿考戶部都吏精於會計却私金饋輒首之堂京師稱爲廉吏宏治間授騰驤衛經歷歷嘉定瀘州二州同知俱祀名宦陞保寧府通判吏部尙書桂萼書可羨二字贈之陞重慶府同知改烏撒軍民府同知到官三月而卒淮歷官三十餘年欽賜銀幣者二薦舉一十九獎勵四十三至今鄉人稱爲趙清吏云

德縣志

卷十

人物志 耆英

九

袁 擯宏治乙丑進士授大理寺寺正擢知南陽府考最爲天下第一陞陝西按察使詔褒之陞應天府尹推都察院右副都御史巡撫陝西未之任卒居官剛正不畏權貴平生廉苦自勵孫勿嘉靖間以門功知趙城平山二縣廉幹有乃祖風霍州盜起及西賊大舉內犯勿防禦有法百姓以安致仕歸卒於家

鄒頤賢字蘆南祥之子也正德癸酉舉人初授新鄉知縣土瘠路衝一切省齋以紓民困遇旱荒先賑而後請罪邑人感之爲立祠調陽城陞平涼府通判致政歸村居不入城市以詩酒自娛詩學深於樂府著有蘆南集

王進賢字公選正德己卯舉人性好學居廢寺中教授生徒躬行古道動依禮法弟子成立甚衆選沁水知縣民貧且悍號難治進賢

以實心行政均徭薄賦息訟興學縣大治會天旱禱雨徒步烈日中得病遂卒後二十餘年沁水民爲建祠祀之

葉 洪字子源左衛人嘉靖己丑進士授戶科給事中陞工科右給事中性剛毅遇事敢言彈劾不避權貴疏凡數十上所言皆軍國大事具載世宗實錄又疏請改德左二衛學附山東鄉試諸生便之亡何劾張孚敬汪鋮專權納賄謫寧南縣丞尋罷官歸有先人遺田百畝在西河上結廬於中人莫窺其面臺省撫按交章薦洪宏才淵學直節正氣亟宜召用竟格於舊例而止嘗樹柏三百本於學宮獎拔士類孜孜如不及自壯及老竟日危坐年七十五無疾而卒孫敬愿萬曆壬辰進士知樂亭縣

程 瑤字子彬左衛人其先本掖縣人父賢爲人沈雅剛毅慷慨好德 縣志 卷十 人物志 耆英 十
施爲鄉里重瑤以嘉靖壬辰進士授懷慶府推官廉介明決案無留牘遷兵部武庫司主事歷陞尙寶卿與袁州胄子同列以守正不阿左遷戶部主事歷四川陝西浙江廣東叅議副使山西按察使江西右布政使所至鋤強扶弱奸胥猾吏望風屏跡居鄉不營利不請託嘗有懷金乞一刺者立斥之去門庭寂然勤儉潔修至老弗易居第後築一舍顏曰靜軒日誦讀徜徉其中寒暑不輟尤喜成就後學年八十六而終遺有右丞稿行於世

魏 綱左衛人嘉靖甲午舉人授太谷知縣以清幹稱丙午分校山西所取皆知名士以親老致仕歸里居讀書足跡不入州府有山東督糧道爲分闈時所取士見綱貧以三百金爲壽綱曰幸有薄田足以餬口無需此却之年八十六卒

劉 佐嘉靖乙未進士歷官冀北道山西參議所至多有聲績生平不爲請託生殖置義田二百畝以贍族之貧者鄉人稱之

盧宗哲字溶卿左衛人其先家涑水嘉靖乙未進士上親試庶吉士得三十人宗哲居首授翰林院檢討陞南國子監司業考滿嚴嵩欲羅致之宗哲曰某來考績不講遷官也乃以爲南尚寶徙通議居三年召爲太常提督四驛館擢南太僕馬蕃息寺有贖金三千或謂例應納笑曰豈有懷金盧溶卿哉入爲光祿卿故事上供不時予估人值往往破產宗哲悉發羨金償之久之推戶部侍郎嵩居中不報請告歸偃臥舊居故人來則彈碁酌酒終不請詣上官年七十卒爲諸生時天津故有節帥過之見宗哲冠敝請以新冠易公爲座上一著罷酒仍著故冠而去其介如此後罷光祿發橐

德縣志

卷十

人物志 耆英

十一

中裝餘四十金召子茂示之曰此予二十年宦裝可受之茂亦清勤著聲官至歸德府通判

党 淳字濟西嘉靖丁酉舉人爲淮安通判操兵防倭一敗之於廟灣再敗之於姚家蕩民賴以安凌義渠與淳書曰論功業則我不如君論文章則君不如我官至鹽運同知

陳 志號遜巖先世宿松人明初以千戶官德州遂家焉至志登嘉靖辛丑進士知河內縣有能名再補高平以最擢戶部主事遷員外江口口征倭奏以隨與同事者二人往辭內閣閣臣嵩與二人言徐拱手曰君爲誰應曰戶部員外陳志嵩曰是吾所取士耶何久不相聞不答而出還擢郎中督花馬池餉卒於家

張子順字聚甫別號裕菴德州左衛世襲千戶嘉靖癸卯以麟經薦

省元甲辰成進士授戶部主事會計允當以賢能名於時督餉晉陽不假催科軍需悉備暇則與諸生講學義理淵微詞藻雄渾人才多所成就因而從遊甚衆後值大同有警咸寧侯仇鸞統師往禦鸞悍鷲貪暴屬子順主餉或謂宜加禮而厚遺之子順不顧接待如常及鸞事敗人咸服其有定識陞潞安知府三年陞密雲兵備道副使唐荆川經略邊務雅重其德器云

李逢時字化甫左衛人嘉靖甲辰進士起家行人選湖廣道監察御史聲著臺班按宣大風采嶽嶽按徐淮大盜李子強聚衆流劫傳檄勦捕不逾月盜平以保禦功賜金論賞帥尙詔煽動江淮逢時馳赴鳳陽調度賊覘知有備遁去外補湖廣憲副值漢水數溢殫力隄防又會建明堂采木嚴急逢時務爲寬卹事亦立辦陞參政

德縣志

卷十

人物志 耆英

十一

仍守荆南陞山西按察使左右方伯備悉宗民疾苦出納兩平廩祿均給人情翕然致仕卒於家子汝材萬歷癸酉舉人知洪洞縣汝棟隆慶庚午舉人汝棟曾孫允禎崇禎癸酉舉人

宋 諫性之孫於第六子也以郊縣丞歸老於家隱居小圃立家祠修祭禮作祠堂記惓惓於尊祖敬宗藹然仁者之言又作東圃隱居記垂戒後人言尤切摯有石刻存於家

姚紹祖嘉靖庚戌進士任彰德推官重厚老成仁愛出於至誠持法詳明平恕人無冤者遷兵部主事終員外

張大業字新所張海之族嘉靖丙辰進士爲南太常博士當遷官以不阿嚴氏得戶部主事使河西務有禦寇功知河南府多惠政遷湖廣副使平金洞土酋賜銀幣襄藩欲陷良民大業平反之又與

張居正弟居易不協遂拂衣歸里居三十年屢薦不起

魏汝松左衛人嘉靖戊午舉人知湯陰縣歲饑捐俸賑粟施藥活數萬人潞邸之國道湯陰民患之汝松善調劑民不稱厲擢知均州均例僉報馬戶里甲因緣為市汝松力為剗革百姓德之一年解組歸

王祖嫡字允昌隆慶辛未進士由庶吉士授檢討遷國子司業疏請錄建文景泰二帝事深得國家大體官至兩淮運同著有書疏叢鈔家庭庸言文集三十七卷俱列明史藝文志

蓋 梁字虹江本陵縣人祖汪從軍有功授德州衛千戶遂以官為家梁中萬歷癸酉舉人除茶陵州知州陞鞏昌府同知治岷州以軍功欽賜銀幣致仕歸仕之地皆有特祠崇祀自為諸生及舉孝

德縣志 卷十 人物志 耆英

廉一切外事皆不與惟開館講誦一時名士如楊欝宋鴻儒皆出其門下天性孝友親歿兄弟終身同爨其少時往見先達丁公永成丁曰子聖賢路上人異日且為民造福丁公可謂知人

謝廷策字正甫左衛人萬歷己丑進士館選時有欲為介紹者廷策謝曰某甫仕何敢擇官竟不往比謁選除陝西高陵令至縣諮吏治革民所疾苦手自劑量定條鞭法以四季輸官民稱便前後開釋疑獄甚多條便宜若干事行之居五年以廉能聞徵拜御史時

上深居禁中朝講久虛諸臣多以言蒙譴廷策入臺三月即上疏引周宣王晏朝姜后脫簪及宋仁宗從趙抃之請召還唐介等故事以諫忤旨降一級外調都御史袁貞吉等連章申救再謫懷仁縣典史歸里丁母憂哀毀得疾卒泰昌初贈光祿寺少卿廷策為

人孝友清介卒之日囊無一金子昂字伊晉萬曆丁未進士官至大學士清朝徵拜左柱國內院大學士少傅兼太子太傅吏部尙書卒於官贈太師諡清義

程 紹字公業左衛人父訥字季敏爲諸生剛方直諒以子貴累封工部右侍郎通議大夫林泉自娛風味脩然年八十六自製墓銘而歿紹中萬曆己丑進士除汝寧府推官廉明仁恕多所平反擢戶科給事中白簡屢上彈劾執政執政心銜之礦稅之使奏逮有司旁午道路紹再三抗論上優容之山西礦使劾知縣韓董紹特疏申理遂除名爲民家居奉親二十餘年光宗御極起太僕寺卿推都察院右副都御史巡撫河南精心吏治時承平日久兵馬芻糧司吏窟穴其中紹一切按覈討軍實而申儆之儀封宗人淫虐

德縣志

卷十

人物志 耆英

十四

彰聞道路以日紹列上罪狀詔發高牆諸宗惕息相戒莫犯歸德汝寧彰德間羣盜煽動相繼撲滅會玉璽出臨漳上言國之所寶在賢臣因薦鄒元標馮從吾等時諸公方以門戶得罪疏上觸權奄怒遣詘事人至汴久之無所得乃嗾御史論紹借題援引門戶諸臣紹遂移疾歸德州議建魏忠賢祠紹率諸紳士力止之崇禎中起工部右侍郎以年老乞休得請卒於家子震江西驛傳道僉事秦建昌府通判

郝 沂字魯泉德衛人好讀書家貧不能得書乃日夜手抄無間寒

暑幾數百卷南充黃公輝極敬之晚年以歲貢授紫陽知縣爲令三載家無擔石焉初州人程公紹任戶垣時沂在邸中與黃公交莫逆官定後黃寓書與程謂魯泉學貫天人僅使得一紫陽令此

吾輩之責也其推重如此

李誠明字思伯本商河人自其祖始遷於德父大華萬歷癸酉舉人知武強縣治行清介秉性剛方縣有巨室誣七人死撫膺自矢不肯殺人媚人竟平反卽以此棄官歸卒年八十二誠明中萬歷甲午舉人博極羣書以至天文地理戰陣推步數術之學無不通曉皆有獨解與世俗所守師說不同而內行純備孝友過人冰心鐵骨一介不取登賢書四十年未嘗一字干州府長吏莫不愛敬之天啟間閣輔朱廷禧薦爲中書舍人不就魏忠賢竊柄遣人以厚幣聘之託病固辭不赴遂不復上公車獨居東村別墅建一亭椽檻瓦甃俱方名曰矩亭朝夕鴈詠其中讀書自娛又十餘年卒詩文典雅學者稱爲泰雲先生崇祀鄉賢祠弟讚明崇禎庚辰進士

德縣志

卷十

人物志 耆英

十五

歷陞山西驛傳道僉事子源清順治丙戌進士

馬惟聰萬歷癸卯舉人其先世由青遷德天啟間知武安縣地當秦晉孔道時獮寇竊發邑鮮兵惟聰集邑之少年勉以大義擇其有勇力有胆識者爲壯丁以備寇壬戌冬獮攻破磁營惟聰督壯丁往獲其渠魁獮衆逸不敢再犯遠近以安遇歲旱惟聰齋宿虔禱遂得雨歲大熟士民畫靈雨圖紀之

杜逢春字見賓號茂華性倜儻大雅不羣邑諸生少治舉業在庠序錚錚有聲萬歷間以世襲衛指揮督運漕河捍衛京陵仕至大同中路副總兵都督上元姚遷客大同與潞朱克鱗樂昌朱隱鑑等三十六人舉雲中詩社將軍其一也旣而叅戎馬水雍容坐鎮四封晏如日常賦詩良足自快雅有羽扇綸巾之概逢春其儒將歟

葛汝禮字會夫萬歷甲寅歲貢授金鄉訓導陞文登教諭教人以修德立行爲本年七十八卒於任諸生皆衣縞素爭相助賻

金 煉字伯精左衛人先世籍浙之餘姚明初家於德父世臣字汝勳家貧藉脩脯供甘旨從遊者日益衆生養死葬不以貧殺禮貢入太學忽心痛亟馳歸不數月父卒其誠孝如此謁選爲滄州訓導一士幾誣服於法世臣力白之以廉能擢山西廣昌知縣邑小而衝冠蓋往來疲累不支世臣悉心經理客無留行民俗悍每睚眦自殺以傾仇家世臣讞決得情民咸革面值歲饑做富鄭公煮粥法全活萬人以子貴奏封去官角巾歸里隱居山莊恬淡之性老而逾潔及就養時以大法小廉勉其子眞可謂以身教者煉中萬歷丁未進士授戶部主事督楚漕司延餉輓輸以時賜金增俸

德縣志

卷十

人物志 耆英

十六

拜河南叅政陞按察使再陞江西右布政兩院請以新秩留煉在中州五年執法不阿風采嶽立擒滅禹鄭間妖人劉顯吾王撫民劇盜馬一騰等上書屏紀勳攝篆左伯全豫所輸上金錢第令輸者自衡中程則給符亟遣去人咸便之連丁二艱起補陝西右布政平涼多朱邸難治煉彈壓肅然宗民帖息俘斬流賊王天壽馬角腦等固原軍謀擒惡首十三人誅之指麾而定以病乞骸骨歸居家孝友廉靜無間疏近皆有恩紀敷歷中外二十三年却苞苴斥厨傳朝夕所給俱平值市之民間所至以治績聞卒年七十一崇祀鄉賢祠子壽祖以貢生任池州府通判性至健有斷制程正夫所謂如四楞古鐵立地卓然不可搖動者猶子宏祖季弟炯之子也篤於學枕河干爲塾置背水社角藝嗇于遇竟賣志沒士林

惜之其嗣子庭遠爲學博不數年卽告歸耽泉石不愧廉吏家風
劉嘉允字繩懿別號象山父蒙亨早逝時生母張氏姪未婉越三月
嘉允生嫡母徐氏與張氏傾囊出其先世積財暨田宅分給族衆
樹牆塞門長齋食粗糲以謹護其子事見閩範志嘉允生而穎異
弱冠領童軍萬歷己酉登賢書事兩貞母備極色養以孝聞年逾
五旬兩母相繼歿哀毀骨立大事畢遂以疾卒爲人端方醇正動
必循禮燕居亦不苟接待賓客卽後輩盛暑必正衣冠見敦陸族
黨內外無間言與李泰雲先生同時事事取法爲莫逆交在孝廉
中聲稱藉甚數上公車阨於一第士君子皆惜之

呂 恂字信吾左衛人萬歷壬子科舉人天性聰穎篤志好學讀書
期於明理所著有春秋大義四書蒙引諸書平生交友以道義相

德縣志

卷十

人物志 耆英

十七

規與李泰雲稱莫逆四上公車因策論多憂時憤世語未得一第
士君子深惜之

郝勸善字同吾天啟辛酉舉人初補博士弟子員郡侯馬明瑞視其
文奇之欲延爲其子友三聘不至後舉於鄉遠居東村足跡不履
城市家有茅屋數間課子會文遠近生儒咸集見有善作文者好
之不啻口出生平不置產陵縣楊起田有別業直千金以二百金
售之且寬其償期實欲贈貽也拒不納五上公車不第時鄉薦座
師已相勸令仕遜謝不出一生澹然無欲天性孝友鄉黨愛敬之
趙州牧字起潛爲人剛正淳實居河西五里莊日策蹇至西郭授經
夕而反寒暑不輟嘗夜歸有盜出叢薄間見州牧皆慚懾詭云迎
趙先生控驢至村口而逸以明經爲日照縣教諭造就多名士長

孫景星崇禎丙子舉人清朝順治初署武邑縣事有撫盜功除大名府通判治順聖管宣府南路事平勸賦輸課爲上谷最卒之日行李蕭然次孫其星順治辛酉進士黃州府推官改汾陽知縣程泰字仲來紹之次子天啟改元恩貢崇禎年間入中書修熹宗實錄壬午書成次年授建昌府通判甫出都而難作感憤成疾家居久之遂不起泰性篤孝隨父侍郎之官邸事無巨細多以委之尤諳於國家典故豁達好施不問家人生產有遺詩嘯歌集

陳希夔字大章天啓元年恩貢初授邯鄲丞曰丞何負於人哉聿修厥職不敢效崔斯立吟哦松下也以臺薦陞沁源知縣沁民素悍縣吏每以苛政吹索之率逃亡虧賦希夔單騎下鄉先問疾苦然後勸之使輸不取耗民感之歲賦以完政聲大著居二年以忤上

德縣志

卷十

人物志 耆英

十八

官意拂袖歸爲人沈靜寬平飲酒讀書陶然自得人愛敬之次子鍾英清順治辛卯科舉人儀觀甚美博學能詩與其兄懋英終身同爨宗族鄉黨稱之其接人應物雖農夫賈豎必以禮年四十三而卒世共惜之

王都號介清先文登縣人徙德左衛以天啓乙丑進士初選元城後補滑縣元劇而滑腴公馭劇以靜處腴不脂縣人尸祝之精吏事老猾積蠹不敢售其奸擒平巨盜斷毀賭具治獄平反其於輕重出入深致意焉孤立不事要津行取擬南臺上御筆簡拔禮科給事中陞工科都給事中太常寺卿卒於京所著有法戒編棠棣客問朱子漫錄順治六年崇祀鄉賢祠

盧士濯字德水宗哲曾孫生九歲而孤哀毀如成人事母及兄姊以

孝友聞中天啟乙丑進士授戶部主事乞侍養歸服闋補禮部改御史僂漕運時久旱河竭盜賊縱橫條議上聞皆中肯綮報竣移疾趣歸甲申之變士灌與鄉人擒斬僞牧倡義討賊大清兵下山左以原官徵病不行又數年卒於家雅好賦詩最慕少陵嘗卽家爲亭祀之架上有書萬卷與客飲碎輒隕然自放有陶阮風未卒十年前卽爲棺槨掃除墓地自稱南村病叟有文集若干卷行世其春秋閒說一卷見四庫全書

羅國士字尙友號嶽瞻生而瓌奇負氣節天啟丁卯舉於鄉崇禎丁丑成進士初令直隸固安縣民多奄寺斤斤繩之以法民憚其威橫稍斂抑丁內艱服闋補河南安陽縣知縣係趙王藩國威如山立冰清嚴聽訟絕苞苴民好健訟灼見其僞力爲斧斷刁風頓息

德縣志

卷十

人物志 耆英

十九

境有駐軍譁變恩威並施亂機立靖時有逆寇王捶頭李得海等蹂躪四省設謀就縛民賴以安壬午入關分校披沙鍊金相士於驪黃之外取皆名士稱得人焉鄴城宗儀難馴軍民交雜兼以土寇猖獗所在戒嚴而登陴之籍動以戚畹諸校免公具啟藩府一體編派因搜獲賊首史天祿王自明等窩主皆與藩府連帶盡置諸法鄴人安帖提封八十四里陷賊及徙死者五十餘里多方撫綏流離復業魯有豸矣邑有蝗災親爲捕捉時逢荒歉捐廉俸施粥糜男婦全活者七百餘口至若申豁荒耗撐持驛站修儲軍備拊循作養均載洹陽永澤之編垂爲世守以異擢禮部主事旋授陝西道監察御史巡視中城鋤強植弱不畏彊禦雖疾惡如仇意所不可石激火焮而風過波平不念其舊故畏而懷之者衆矣迨

告歸田里營室築圃蒔花藥以自適風日晴美奉高堂板輿宴遊
萊衣歌舞天倫之樂融融洩洩者豈爲過歟與人則不設城府
推誠任素與當代賢者握手出肺腑無匿言無態色宣孟成季子
將兼之矣論國士之爲宰也以循吏稱其爲侍御也以直臣著其
退歸林下也以隱士名所謂君子存心丈夫行事而大度淵涵雍
雍然儒者之氣象年七十有六卒於家海內名流聞者咸痛惜焉
其子達适皆名士暹字硯田以廩貢歷任貴州驛糧兵備道遴字
甌枚任兵部武庫司主事有父風

蕭時亨字天衢別號會寰原籍遼東鐵嶺衛人幼倜儻尙氣節年十
五襲指揮僉事守三岔威遠二堡恩威兼濟軍士戴之崇禎五年
寄俸德州衛遂家焉人有勸之仕者時亨恬淡自甘杜門不出日

德縣志

卷十

人物志 耆英

二十

惟課子讀書有萬石家風以季子惟豫封翰林院編修不尙華飾
不乘肩輿樸素如平時性慈好施周急振乏傾囊不惜士林重之
舉鄉飲大賓年八十二卒

清

程先貞字正夫別號蕙菴以祖紹廕歷官至工部營繕司員外郎以
病告歸志行端慤讀書樂道依然儒素之風甲申之變與盧士淮
誅僞官家居三十年杜門簡出以詩酒自娛未嘗一預外事每同
人讌集慨然以扶風教崇儉樸相敦勉里中節義事採訪最確手
自楷錄或傳或詩彙成帙編州乘一書垂成而卒年六十有七稿
交李星來趙仲啟賡續進行乃付剞劂曾預製一棺題曰休息齋
著有燕山遊稿還山春事十五臣詩蕙菴詩草蕙菴詩窺園百一

詩集百二詩集共十數卷子彥頡彥穎皆彬雅能文克世其家

李允禎字貞甫左衛人父嗣美字允方增生天性曠達真誠坦易以子貴贈奉政大夫工部營繕司員外郎允禎中癸酉科舉人清初除故城令廉潔持己慈惠撫民人咸頌其遺愛調豐縣令邑故健訟下車卽力除訟師發奸摘伏儼如神明人皆畏服肅然稱治會黃河決需柳梢數十萬使者督趣旁午允禎乃親自行野量多寡遠近俾以次輸河干而予其車牛芻秣民不擾而事辦攝礪山篆有平盜功歷陞工部主事督清江船廠釐剔振刷諸弊一清課士於清江書院而人文蔚起時淮揚歲飢道殣相望捐俸煮粥哺之全活甚衆淮人建祠勒銘祀焉晉屯田司郎中遷廣西左江兵備道以疾乞歸爲人沉靜端慤動必準禮內介外和與世無忤鄉閭

德縣志

卷十

人物志 耆英

二十一

欽其德望卒年六十三康熙元年崇祀鄉賢子浹中順治丙戌進士濤潤穎敏好學文望甚藉識者器之

葛枝挺字筠鄰號雪龕爲諸生性疎放工詩積書甚富康熙癸丑撰州志稿嗣復逐年增記又二十六年至康熙三十八年卒惜故後志稿散佚無傳而其緒論往往散見於他書蓋潛心考古終身如一日云

李浹字孔皆一字霖瞻允禎子順治丙戌進士知延慶州上官以其才識俱優調補茶陵州嗣以失察降知芮城縣甫下車卽豁浮額丁銀革除蒲州協濟值大同兵變與李源間關渡河懷印請兵身爲嚮導力圖收復卒陞吏議歸遊覽山川詩酒自娛晚築室曰陶菴貯書數千卷環以竹木徜徉其中卒年八十著有年譜詩稿

行世曾孫國柱乾隆辛酉拔貢性清介詩瞻逸深穩有大歷十子風著有秋厓遺詩見四庫全書

李源字星來一字江餘誠明子順治丙戌進士知河津縣寬徭役緩催科三月流移悉復豪右張家壁縱子肆攘奪鄉里患之源寘之法盡反所攘民慶安堵修薛文清舊宅令諸生聚學上官檄有不便民事輒封還咸目爲強項令大同有警繕城濬濠爲死守計五閏月叛宦張家壁內變源突圍走與李浹同志請兵前驅擊賊於蒲破之進克河津擒家壁於大元砦事旣平吏議以功過相準乃告歸葺先人矩亭觴咏其間州人將舉爲鄉飲賓辭不就年七十卒子楨國子監學正森國子監助教棟康熙庚辰進士中書舍人櫟康熙己卯舉人

德縣志

卷十

人物志 耆英

二十一

趙起鳳字于岡一字羽聖先世官衛百戶祖父皆文學士起鳳舉順治丙戌鄉試篤行誼天性孝友鄉黨敬服尤以敦宗睦族拳拳於懷奈家道不豐欲仿范文正公置義田而力不贍歲時必集族人相燕樂祭祀必誠必敬約朱子家禮酌古準今著有敬誠集一本歌色養集師友俎豆小錄無一字不本躬行讀其書可以知其人矣孫如范旌表孝子另有傳次孫如陸有祖父風潛心理學註孝經十八章與後進講學多至理名言是爲善承家學者也如富拔貢如房乾隆丁卯副榜俱如范之異母弟皆如范教之亦均能世其家學焉

田緒宗字仿文別號蓼菴其曾祖三戒縮農曹以廉介聞父實栗庠生湛深經術教育誠篤每鷄鳴焚香告天有古清獻風緒宗其仲

子也姿穎悟性端嚴文筆沉雄力除啟禎時文人鉅釘訛駁之習
奈邁家世之多故鍵戶著書者數年順治壬辰成進士待銓於家
邑爲漢董仲舒故里唐顏真卿爲平原太守醇儒忠臣異代同揆
創合祠額曰董顏書院士之讀書其地者俎豆弗衰癸巳八月選
授浙江麗水縣知縣甲午二月抵任麗水殘邑徭賦紛戾胥吏高
下作奸緒宗勾稽土田戶口定履畝之籍造煙居之冊大紓民困
通濟堰在郭西五十里始自蕭梁時障松遂兩溪水分四十八派
灌溉民田後大水決堰田散土龜單騎往視浚復以興水利又學
宮居擇山之巔世傳唐李鄴侯泌所建韓文公愈爲之記兵燹圮
廢亟出俸金以新之立麗澤文社月課諸生嘗作筮仕記一編於
古之循吏勸農建學士習水利諸往事無不備載行政諸端悉如
記中之語甫及三月民歌曰邑侯清婦子寧邑侯廉婦子安是年
五月以疾卒於官時年四十有六邑氓哭之咸效桐鄉之祀今廟
存焉祀麗名宦祀德鄉賢其出其處可謂胥合於道矣所著筮仕
記一編見四庫全書

孫 繼字曰可號書臺順治乙未進士授長洲縣令初筮仕查賦額
及五十萬不忍民之難堪也緩征之曰吾已辦下下考矣舊有冤
獄漁戶數人爲仇者買他盜入之死繼廉得其情上官遣吏來趣
具獄辭繼出漁者指謂吏曰若輩盜者途之人皆盜矣力白於上
官出之有富家橐金四千求殺其所怨者厲聲叱去之其廉平類
如此人咸稱之爲清介先生果以賦不及額去官韓菴墓表曰循
而吏可也循而失吏其可惜也夫旣罷官滯長洲民爭爲僦居具

飲食偶過里塾聞李勣讀書聲而異之勣者李文科仲子也繼乞以後其長子雲錦文科念繼之保民若子也從之易其名曰孫勣挈而歸以書籍自娛教勣讀書勣成進士入庶常書誠之曰汝爲吉哉士必九德中有一二又曰汝得名太早稱塞恐後勣典試又誠之曰汝勿有易心勿以能得人自多其訓誡如此其自立可知已

蕭惟豫字介石號韓坡時亨子順治戊戌進士由庶常歷官至翰林院侍讀典試江右督學順天父時亨書公明慎三字勗之年甫踰三十三乞養歸蔚州魏敏果公象樞以惟豫與平湖陸清獻公隴其同薦因母老陳情不復出時乘牛車一童一杖步村墟中見者不知爲薦紳先生也祀鄉賢子承洙拔貢生善書汝上教諭姪曾

德縣志

卷十

人物志 耆英

二十四

孫忻康熙辛丑進士由文選司考授御史克守家風

陳洪諫字憲宸號覺菴順治己亥進士授四川峽江令治水有功陞雲南麗江府推官康熙七年裁推官改江南興化令時興化疊罹水災饑饉遍野洪諫顧之心惻值大吏以會勘河工駐境乃刺血書牘爲民請命書七上乃得請民賴以活復自捐千金供支應毫不累民歷任江西撫州同知袁州知府陝西神木道慷慨任事所至以才幹稱年老致仕曾建文武閣於柴市街東遇斷橋圮路皆捐貲修整鄉里感之與蕭侍讀同稱焉國史有傳

趙其星字仲啟州牧孫順治辛丑進士授黃州府推官尋改汾陽令罷歸林棲二十餘年甘貧好學課藝談經文名藉甚遠近皆知一時四境及鄰邑碑銘誌傳文字皆出仲啟手重其文重其行也

田 雯字綸霞號山薑晚號蒙齋緒宗長子康熙甲辰進士授中書
歷戶刑工各部司員壬子分校順闈最稱得士督學江南力崇古
學釐教條十五則訓士文風丕振及督糧湖北十日內辦荊州兵
糴六萬餘石又挾漕政十二弊捕南糧大蠹置諸法由是朝廷益
重其才擢光祿寺卿旋命巡撫江南甫下車卽於地方民生之最
切者具五疏皆報可又奉命偕總督董公訥總河靳公輔會勘下
河因力持公議不徇曲說幾爲同事中傷遂調撫貴州時值苗狎
猖獗徧閱輿圖於苗盜出歿之地除窩家立連坐法擒一二渠魁
黔境獲安土總兵龍天祐向肆跋扈至是納款軍門願効驅使復
有會川番蠻阿所殺主叛陣傷守備常珍奔匿老安氏水城內蜀
撫奏聞差官至平彝衛會同督撫提鎮商確機宜衆議出兵雯獨

德縣志

卷十

人物志 耆英

二十五

不可曰蠻逆據險負固兵力難施用剿不能損威無益乃自作檄
文下移老安氏不數日竟縛阿所以獻衆皆拱服且謂一紙書勝
十萬師益信德威之孚遐邇矣黔處蠻荒數十年無發甲科者因
重脩甲秀樓以助形勢並脩武鄉侯王文成二祠葺龍塲書院購
備經史詩文數百卷集諸生講學其中公餘暇日自行課督文風
日盛因有翰苑之選且有詩人之彥化童澤石脊之地爲禮樂文
物之邦大法小廉猓狎服而部屋安黔人各於歲首署門日夜耶
復且羅旬回春其治績大可想見矣及丁內艱去黔民泣送者百
里不絕又爭率醴貲築山薑別業以祠之至今俎豆不衰服闋後
特簡刑部左右侍郎戶部左右侍郎雯之生平遇事無兩可見義
必爲無觀望敦歷中外建樹勛名可謂出處無虧心結主知至主

文苑騷壇者數十載詩名並駕於阮亭海內望之如泰山北斗其聲震三苗威服蠻方則知德化之感人爲甚深也著有蒙齋年譜四卷黔書二卷長河志籍考十卷古歡堂文集十二卷詩集十五卷幼學編四卷詩傳全體備義等書見四庫全書仲弟需字雨來號鹿關康熙己未進士官翰林院編修國史館纂修甲子典試河南取皆名士時有鐵網珊瑚之譽以病致仕齋居一室服御蕭然著有水東草堂詩集厠塾錄田子篋中稿與長兄同祀鄉賢季弟隸字子益號香城由拔貢生授堂邑縣教諭辭不就築鬲津草堂藝菊吟詩擅風雅者三十餘年饒有靖節風規詩集入四庫全書謝重輝字方山號匏齋清義公嗣子本生父陞拔貢生甲申之變率衆誅僞保維桑梓地方百姓倚重長城重輝歷官刑部郎中雖由

德縣志

卷十

人物志 耆英

二十六

廕起家而博雅好古與田侍郎並駕齊驅名振壇壝新城王文簡極稱京師十子之詩德州居其二咸推重之蒲州吳雯亦以詩名著重輝薦舉之性傲岸不與俗伍後引疾歸著有杏村集七卷見四庫全書

馮

沛字雲生先世卽墨人遷德家焉父嘉貞始治儒業沛卓犖負

奇爲王太常都高弟明末葺廬河西臨流而漁網斷之屬自爲之其所寄託者遠矣中順治辛卯舉人素重義氣援人之難若切己膚姊氏貧撫二出如子妹婿爲駟僮仇陷奮髯往力爲排解事旣白仇反整沛於是杜門謝客授門弟子周易孝經其時年四十餘矣事母至孝孺慕依然母歿哀痛不已未葬病不起易簣時諄諄戒子廷櫬母學調母貨殖此卽漁于河之志也眞名士哉

盧道悅字喜臣宗哲六世孫少孤事母孝事伯兄謹康熙庚戌進士授隴西令經理軍需有方鄰邑戍卒譁單騎諭定之鄰邑民相謂曰盧公來我婦子不以驚怖死矣再知偃師值歲歉多方撫綏治十年流亡盡歸既致仕民祠之卒崇祀名宦家居汲引後學多所成就年八十七卒崇祀鄉賢子見曾另有傳孫謙字搆吉爲刑部郎中未三月清理積案八十餘件擢武漢黃德道值災賑親歷鄉村日行泥淖中戶口無遺無濫楚俗健訟多上控立章程令州邑按季造報自理詞訟以核勤惰偶有情節不符者提案訊斷三年結提訊並來控者三百餘案所屬州邑結自理一萬七百餘案以事去官再起授廣平府同知盡心司河捕不懈致仕歸卒年七十有三子孫衍昌可以徵世德矣

德縣志

卷十

人物志 耆英

二十七

李濤字紫瀾允禎子浹之弟也康熙乙卯解元丙辰進士庶常入明史館事纂修出守臨江誅巨盜雪冤獄擢浙江鹽運使潔清自矢康熙皇帝南巡特書惠愛二大字褒之又擢廣西布政使修舉庶政皆有實績擢太常寺卿庫有羨金封識之歷官至刑部侍郎乞假歸居鄉盛德名姪蕭侍讀浙粵皆祀名宦子徵臨雍正癸卯進士入翰林早卒弟潤潤子元瓚辛卯舉人

馮廷槐字大木沛子幼號奇童讀經史諸書寓目不忘義理了徹別具會心鄉先達驚其才咸稱其同於子厚奇童之號誌異也長而好學高才絕俗詩文均超逸不類凡響其詞調之刻露似島佛態息之清超似陶令意致綿邈寄託遙深似商隱不斤斤於聲調不察察於骨格而一種高華丰度可望而不可卽者此真名士也性

情孤高落落寡合不喜交朝中權貴獨與青州趙秋谷宮贊爲契友同賦武侯銅鼓長歌一時名流盡皆擱筆王文簡稱爲二妙詩格可想矣康熙戊午舉於鄉壬戌成進士以中書舍人典試湖北榜旣發暇與諸名流載酒支筇登黃鶴樓俯瞰江漢之流遠眺內方大別諸名山南望瀟湘洞庭慨然遐想賦詩百篇是雅是騷所弗深計文簡謂其孤峭益甚而詩文益奇者也又曰嚶嚶然慕古近於狂不屑不潔近於狷其非狂狷之流亞合於聖之清者乎而今無其人矣著有馮舍人遺詩六卷

李文科字玉峰江蘇長洲人康熙丁未遷德州城東家焉始祖自婺源遷於吳居王埭歷數世其族半王埭與右族顧氏埭父寔隱於鍛母翁氏夢有朱衣人搢笏坐於左驚寤遂生文科有異狀眉上

德縣志

卷十

人物志 耆英

二十八

指若髮父母相繼歿文科無力讀書學賈居長洲值馬士英縱敗卒肆掠吳人驚而走與衆渡河旣渡衆將毀梁文科止之曰吾賴以免而絕之以殺人不可事平而還娶張氏生勸勸勸四子嘗以賈之崇明崇明懸海外其卒多掠文科走謁其帥與語帥悅屬以軍事於是出而誓於衆曰淫者劫者殺無赦醉而酤者刑之軍政肅然以清已還蘇見遺金於路守失者至還之却其謝感孫繼宰長洲無愧民之父母因繼乞勸爲長子雲錦後允其請並勸而挈之東七年勸卒勸爲庠生屬其友陶元淳求仲叔文達及二弟於吳辛酉勸舉於鄉適文達與勸至文科曰吾今而後喜可知也已乙丑勸成進士授檢討文科封如其官以書誡之曰母謂爾官貧固已顯爾親矣爾其勉焉得終於貧是吾望也臨終遺命曰吾

嚮也固欲爾之以清終其身也吾死必事吾以儉文科未嘗讀書能識大義言必有中其賦於天者優矣孫于益康熙庚子舉人知平羅縣曾孫今萬乾隆丙子副貢官階州州判

盧見曾字抱孫號澹園別號雅雨山人宗哲七世孫幼從中州名儒高矩菴先生讀聰慧絕倫學問具有根柢學詩於王漁洋田山薑兩先達益究精粹山薑嘗稱之曰吾鄉後起以詩名家者當在斯人康熙辛卯登賢書辛丑成進士授四川洪雅縣知縣洪係積疲之地民苦雜派悉數除之擢六安州有妄呈官塘八十一口爲可開墾成田者上官將允行見曾力陳水爲田毋無塘則無水無水則無田事乃寢調亳州亳地素多水患因開龍鳳等溝使水歸於渦以達於淮水患遂除遷廬州府調江寧再調泗州濬西湖興水

德縣志

卷十

人物志 耆英

二十九

利穎界豫豫將開賈魯河以鄰爲壑穎處下游勢必受患復援引古今抗議屈之遂罷其議旋陞江西廣饒九南道趙安撫國麟奏請以陞銜留穎清理通省大案蒙批允行悉心處理五閱月事竣始赴江西履新未幾特授兩淮鹽運使下車後清理積弊調劑民食國計民生兼籌並顧暇則讀書吟詩與名流相唱和主東南文壇一時稱爲海內宗匠嗣以微嫌被劾候勘羈揚居董相祠日以飲酒著書爲事越三年案始定以將出塞其留別揚州故人詩有三年便許朝金闕萬里何辭出玉門之句袁簡齋稱爲絕調尋蒙賜環以直隸州知州需次直省時灤州因荒歲借糧前牧辦理不善將致變見曾奉命赴灤抵任後竭誠訓諭民皆帖服適降甘霖歡聲雷動灤人爲建喜雨亭謂隨車雨也灤地旗民雜處積案纍

纍逐一清結不期年灤治一新至其守永平遷長蘆復調兩淮所到之處無不以仁民愛士爲汲汲素性清介最惡苞苴羊采巖峻令人望而生畏雷翠庭曰見曾身不滿五尺而氣雄萬夫其品節可知矣彼宏獎風流發於至性如識秦殿撰於未遇恤邵中丞於寒微尤具卓識戊子以後家雖中落而自丁酉以至己酉諸孫聯翩取高第入以爲食其先德豈非篤論哉所著雅兩堂詩文集六卷雅江新政十餘種雅兩堂十種金石三例金石錄山左詩鈔出塞集感舊集等書行世

孫 勳字子未號峩山康熙辛酉解元乙丑入翰林授檢討文名滿天下典閩試有請託無可卻者勳不肯以私恩負國悉黜之宗人李若谷遊貴者門傳其意欲得勳一謁勳不可欲得勳子于盛往

德縣志

卷十

人物志 耆英

三十

勳又不可己丑督學貴州擇士之秀者集黔陽書院親教之若陳法包祚永朱定元李運昇王瓚程仁圻米繡皆所造士也巡歷各郡埽除陋例及代不能具資斧黔撫劉蔭樞密疏薦之癸卯補通參冢宰隆科多使同官舒通格道意曰苟過我巡撫可得也勳力拒之其門人唐赤子張泰基在年羹堯幕數以書召勳不答羹堯入京詔公卿迎於蘆溝且詣其第羹堯一見輒歎語暇幸過我勳唯唯及造門門者固要入見勳曰吾奉天子命來不可以私見遂還又擢大理少卿服官數十年落落無所附視依附權門蠶取名位者賢不肖何如哉壬寅德大飢勳貸於官得米百餘斛以濟族人戚友之無儲者丙午請告歸獨居一室十五年未嘗至城市教子弟接士大夫見鄉人皆在此一室中素病足然祭先必夙興視

羹饌躬拜奠嘗欲以禮復本姓不忍背所生父意而止每一念及未嘗不泣下沾襟也叔弟早歿翼其孤于益成名季弟負租賦請於官分年代輸之每食必呼弟俱至老彌篤生平亢直敢言張冢宰語之曰幸簡言遇事弗太執對曰勸蒙特詔起田間遇事盡言所以報也張江負才名及登第有忌江才謀阻其入詞垣者勸昌言於朝曰百川若不與選無公道矣高安朱文端然之年八十四卒時朱定元爲東撫陳法爲監司相與經紀其喪祀之鄉賢勸嘗謂諸子曰鄉賢之祀重典也顧賢者誠無愧否則徒爲詬厲我死之後有欲俎豆我者慎勿聽及是諸子以治命力辭州牧歎曰此眞所謂賢矣子孫不以力營而鄉人無間言眞所謂賢矣卒上其事鄉有賢者出於庶民婦孺之口學士大夫莫能違之三代之所

德縣志

卷十

人物志 耆英

三十一

以直道而行也豈在祀不祀哉勸所見者大矣勸之文勸之餘事也方苞稱其得曾王遺軌子于盛等哀集百餘篇藏於家所著鶴侶齋集三卷見四庫全書子于盛康熙壬午舉人于盧雍正乙卯舉人邃於禮學于盤亦乙卯舉人雲南昭通府通判于盤雍正丁未進士幼穎異年十一能文中繩墨遂有文名學業日進勸鍾愛之稱其文高潔古秀安溪李文貞歎賞之與于盧同性孝友請以所畀全產讓叔父劾勸樂成之部檄赴選在京邸念親不置會地震不及選而卒京師先達及其同輩咸痛惜之醵金歸其柩江陰曹偃期親送之來州其爲人可知已于盤乾隆丙辰舉人于宣亦丙辰舉人浙江武義縣知縣孫今蘭乾隆丙辰舉人今敬戊午舉人江南貴池縣知縣今廷丙戌進士江南蕭縣知縣

勸僕顧泰最醇謹勦命其隨于監赴京候選監死他僕邢材勸以捲資遁泰不聽扶櫬歸僕之義主之一門孝義感之也故附記於此

何 杰字林符祖籍直隸遵化州前明遷居德州杰最好善遇歲歉捐穀助賑飢者食之寒者衣之死者殮而瘞之置義田八十畝以贍族何家莊無停棺不葬者四十無嗣行善益篤晚年得子猶及課孫享年九十有三孫塾官廬州府無爲州知州擢廬州府同知攝廬州府事著有政績引年歸

楊名世幼而穎博覽羣書家貧從事於幕江南北爭延致之以幕資得官爲浙江上虞縣巡檢署諸暨縣事多惠政時有盜劫海船傷多命一案久不結大吏知其諳於刑名委之審名世廉得賊四十餘人寘之法釋株連者數百人上官欲舉之以年老力辭而歸優遊於泉石間數年而卒

江 治德之王官店人其先世江南丹徒籍明初以軍功授指揮始居於此世襲職其曾伯祖靖川甲申盡節祖振父藩周皆庠生治性淳良事繼母孝篤友愛鄉之人咸重之一言可以解紛以勤儉訓俗教子孫讀書學使者姚梁表其門曰品式鄉閭公舉爲鄉飲賓

趙元爵字蒼儒先世爲萊之濰縣人明初景祥始遷德居城東牌子莊世耕讀父士俊家無厚貲不耐煩劇析其產使二子自謀生元爵以弟幼悉讓與之家徒四壁耳供父母甘旨無缺每慨然念人貴自立於是勞苦經營不憚跋涉少有贏餘輒市田爲高堂養其

父母歿殯葬中禮元爵獨力任之家既饒延師訓讀每以少時因貧廢學爲憾子若孫皆入庠序元爵辛苦成家而負意氣樂施與宗族鄉黨則賙之親朋有隙則排解之有少年以博債來乞助切責之曰具此才氣自取侮辱汝能勉力於學吾當如所乞其人感且愧果奮志成名所居瀕古黃河爲衝道有橋久圯捐千金獨成之人呼爲趙公橋有貸金數百權子母者謀輒左耗將盡請以薄產抵義不受憐其運屯立焚券慰之去司馬子長曰治生有道元爵近之其慷慨尙義又如此去守財齷齪者遠矣

王增祿河東王坤莊人所居近老黃河爲南北大道遇水發車徒不利於行增祿捐金建橋一座橋成州守陳留武往驗工適增祿舉一子州守卽名其子曰大橋增祿又重修擡頭寺置田四十餘畝入常住鄉里稱之爲王善人

德縣志

卷十

人物志 耆英

三十三

顏希聖字振玉刻苦於學爲孫峩山高弟雄於文不蹈凡近小試輒冠軍而塲屋屢困以其所學授徒尤潛心於宋儒之書教人先德行後文章絕異世俗之爲人師者源流所漸有峩山餘風焉自號曰志義痛己之不得志不能以祿養所以志也年五十八成癸卯進士知廣濟縣俗諂事鬼神賽會則男女嘯沓希聖曉以大義而嚴禁之勤聽斷幾於片言折獄一日結數案塵牘廓然一清是年詔天下郡邑人文尤盛者增益入學額濟乃中學時應童子試者二千餘人而前宰不以請希聖莅任已後期力請於上法撫鑒其誠奏定爲大學邑之張生爲盜誣法吏指名逮之希聖知其誣力爲申理未幾果獲眞盜濟有三鎮皆濱大江壠坪其最險者外江

內湖堤百數十丈爲黃梅宿松望江懷寧諸邑民命所繫希聖儲
林木親鑿鋪率衆經理堤工大固丙午秋天水江岸崩壞無數濟
獨無恙己酉罷官歸仍聚徒講經授業依然老書生也年六十九
卒同時宋來會陳英選皆以文名論文者不曰顏宋則曰顏陳

石雲倬字天章康熙丙戌武進士授侍衛力挽三百石弓常侍從出
爲平涼遊擊陞涼州叅將康熙五十四年調赴巴里坤協辦軍務
數年特授慶陽副將改河標副將又特授江西南贛總兵擢浙江
提督調福建提督歷任二十餘年清空糧增砲位節經費修器械
繕寧波城郭一切振靡起衰無不立辦奏請更正弁兵冊籍以杜
頂冒增設水師更番巡察以嚴海防多備副鎗並繚刀火斗等器
以資巡哨分編七標戰船以專責成修泉郡城池門八卦溝以弭

德縣志

卷十

人物志 耆英

三十四

水患改徐州墟桃州隘二僻況以免瘴癘皆蒙世宗憲皇帝嘉獎
准行勒入軍政全書者居其半雍正九年特授西路副將軍掛振
威將軍印甫至邊於土古魯及巴爾庫爾之東西北三面在在設
卡巡躡賊踪立三法日以塵揚辨夜以烟火辨雪以脚印辨瞭望
十分嚴密整頓駝馬器械牧廠添兵防範屢立功十年爲大將軍
所誣時年五十三被逮入京猶荷殊恩念其操守好免其刑具及
大將軍罪狀定吏議以不能預行參奏安置浙江杜門省愆當事
者欲一見不可得追憶兩朝隆恩時時望北流涕年五十七卒次
子景周由河標遞陞四川黔彭都司從公相阿平定金川以軍功
陞江南池州遊擊未仕告休歸

李棟字文衆源第三子也康熙庚戌進士由庶常改中書舍人戊

子典試貴州精於鑑裁以勞得疾卒於途黔人祀之名宦棟爲人
瀟灑磊落官庶常則勤謹斂飭恂恂務職業其家居時嘗有閩人
高宸者以選拔北上遇盜於逆旅創甚棟聞其名於孫勳知爲佳
士輿之歸療治歲餘而可留爲諸子師比其試於京兆不得志而
歸貸百金贈之行其急難好義又如此弟禮字聖木康熙己卯舉
人工詩文倜儻有氣節著茗齋集同年翟景文死貧無以葬捐地
數畝殯之又捐穀數十石代其子償官而脫之於械其慷慨尙義
洵爲難兄難弟禮子徵熊字渭占幼承家學篤志力行雍正五年
詔舉孝廉方正山東舉十人徵熊首列遂以諸生爲浙江武康令
甫下車吏以敝政請奮筆勾之曰君恩不可負也吾何需此承修
海寧海塘木石夫役絲毫不累民移任定海廉潔愛民一如治武

德縣志

卷十

人物志 耆英

三十五

康未幾罷官邑之諸生受業焉呼爲李夫子棟子寶默字敏叔嗣
伯父森後由監生考職特用爲知縣發浙江初知雲和縣在萬山
中文風頹廢創雲溪書院捐俸以資膏火遇有蟲災民謀就食於
閩縣距省甚遠寶默旣詳請賑不及待上官命發穀萬餘石以止
逃者民安聚如故制府李敏達以爲能調鎮海縣值海水災設廠
煮粥三月不遑暇食又調鄞縣士民有青天白日甘雨祥雲之誦
以開府稽口口保舉擢辰州府同知因親老改保定府同知後以
署通州里吏議歸其仁聲在浙亦與徵熊爲難兄難弟禮孫有基
乾隆乙酉解元辛丑進士邦基丁酉舉人曾孫錮癸卯舉人

李 升字階五號槐村舊志孝友傳有李岐李峩兄弟式好升乃岐
之裔祖聚德前明拔貢父維康熙辛亥拔貢其先世家卽墨族人

輪充里長多苦累維獨力除其差始遷德升以康熙乙酉舉人選中書舍人不就性孝友仁恕置義田贍族又置義塚歲飢則出粟以賑親黨之不能自存者或有竊其禾者聽之不願聞其姓名嘗買婢幼而慧疑其士族詢之果然還其家不取直訓課子弟嚴而有禮子世垣字星門孝友如其父雍正癸丑進士知富平縣修北山湖以興水利廉鄰邑巨盜猝捕之一日結積案數十葺南湖書院課士創義學五擢興安直隸州牧築江堤創文峯書院制府劉文正公薦治行第一以知府記名因足疾告歸課徒自給遊其門者俱有所成就年七十四卒世德相承誠積善之家也孫昌後官知縣署貴州正安州事

魏丕承字憲武號藿村康熙戊子舉人考授中書以祖母老不仕承

德縣志

卷十

人物志 耆英

三十六

歡課子性狷介而醇厚有以非意干之者不校及赴義則毅然如不及當事者咸式其廬

趙善慶字怡齋其曾祖繼鼎與廬世淮協謀誅僞官歷官都御史兼戶部侍郎賜祭葬祖起睿順天通判有廉聲善慶由國子監學正歷戶工二部出知金華府以清廉著建七賢祠祀朱子東萊南軒及何王金許四子集諸生肄業其中著有重知堂詩列四庫全書目仲弟時中康熙辛卯舉人嘗捐千金爲民屯除運租之累季弟善述有俠氣以工書稱其叔弟念曾另有傳

李元璣康熙四十五年知浦城縣廉明強毅奸蠹斂跡浦俗命案屍親肆掠仇家元璣嚴緝之弊乃絕捐俸移學於皇華山麓士民咸頌之

田肇麗字念始號蒼厓廩貢廕生考取教習知縣歷官至戶部江南司掌印郎中管節慎庫事務授朝議大夫在刑曹時矜慎自矢庶獄平允與同官高安朱公軾福清李公馥善遷農曹監督富新倉立法嚴肅一切陋規悉屏去有妄傳王命擾亂倉規者肇麗親啓之於王諭令田監督自行鞭責法紀凜然時人稱富新倉爲清淨塲差滿考核贏米二萬餘斛膺議叙以病告歸雍正元年癸卯奉慈旨諭巡撫塞楞額訪原任戶部郎中田肇麗在家消息以抱病未痊覆奏奉硃批此人可惜著該撫加意調理俟其病痊送部引見其知遇之隆如此時時以不獲仰報殊恩爲憾年七十五卒生平嗜讀書著有有懷堂詩文集各一卷硯北猶存錄扈從紀程麻衣消寒錄南北史纂子同之字在田晚號西圃登康熙庚子賢書

德縣志

卷十

人物志 耆英

三十七

隸工曹學習時果親王統理部務稱其能補國子監學正秉公訓士諸生無曠課三年果親王欲舉工部都水司主事以親老辭王嘉悅親書天馬賦一縑並書自執泥金便面獎之同之淵源家學沉酣於詩與陳樹蒼沈椒園符幼魯劉大魁朱霞山張少儀王載揚諸名流沿波討源爲羣雅堂詩文選刻安德詩搜一卷所以闡幽也詩文力追古法書得米襄陽筆意著有詩竹堂彙稿內分硯思詩集一學亭文浹晚香詞詩文詞說共廿餘卷其祖山薑嘗錫以古硯故以硯思名集有各體臨書四冊藏之家祠子孫世寶之孫徵輿著有石南齋詩詞尤精篆隸次孫逢泰亦工書

魏

魏字峻菴康熙丁酉舉人性溫厚相貌魁梧任山西華亭令時青海多故軍事頻仍與晉毗連支應浩繁巍潔己愛民循聲大著

爲黃制軍延桂所器重歿於官貧無以殮上官憐而賻之爲歸其
柩清廉可知矣

謝紫芝字商隱號松泉小字五郎又曰白駒方山先生之孫也貢生
候選州同少時英英有奇氣十歲而孤孀母田氏山薑先生女教
之綦嚴性忼快鄙財利及長才氣鬱勃不能諧俗常寄之於毫釐
素間無不超妙過人蓋隱隱有祖風焉漁洋山人喜之故賜之名
云

宋其桐字鳳棲號柳浦祖籍江西贛州人先世有名琥兒者永樂間
從戎以功授世襲指揮子仕成仕興讓世職聞於朝分爲二百戶
仕成屯密雲衛仕興屯德州衛遂家焉數傳至世淳淳生儒俱衛
庠生儒生讓有勇力善騎射仍以世職官本衛其桐其次子也讓

德縣志

卷十

人物志 耆英

三十八

性豪邁沒無餘資其桐刻苦力學家益落而誦讀不輟遷居小洋
村晝灌園夜讀書油不常得雙麻子以照人爭延爲師其桐以館
餬口而遇人之急輒周之德平孫氏子貧不給其桐知其才食之
誨之無倦友某爲族人逼幾陷於死其桐力救之或怵以威笑不
顧事卒解由歲貢中癸卯順天榜仍以授徒爲業年七十九卒是
能長處約者

陳啓沃字和衷雍正乙卯拔貢是年鄉試第二名性情豪邁文章高
挹羣言爲峩山先生之高弟峩山甚器重之其祖鍾英順治乙亥
拔貢辛卯順天鄉試第二人兩世亞元祖孫聯芳鄉里榮之著有
碧梧詩草行世

趙念曾字根矩性孝友侍伯仲二兄疾如事父然嘗遊勞山之奧區

曰湫陽愛其勝遂以自號雍正間以監生考職第一特用爲知縣發往湖南試用初知華容縣華容故濱湖湖堤壞則田不治甫下車申請修築躬親鑿鋪築杖以先吏民工完瀕河地成沃壤調沅陵縣贖驛卒盜賣之田以省民累緹鐵索於險灘以便行舟舊有冤獄得其情力白之太守李珣珣不可請去官以爭之珣謝乃已他日問念曾曰輿論謂我何對曰第當自問耳人言何恤值黔苗變軍興旁午從容應之事集而民不擾時有官舫北去邑人疑令以家避皆大恐念曾聞遣兩幼子出署嬉民見之遂安以軍功擢澧州牧修澧陽橋民德之楚俗多淫祀念曾在沅沈白帝像於江在澧碎五通木偶火其廟曉民以正義俗爲之革事無大小必躬親之積勞成疾卒於官宋弼銘其墓曰謂公不遇有特達知謂公遇矣而未竟其施誠哉

德縣志

卷十

人物志 耆英

三十九

馬國棟字允武其先世由益都之石羊村徙德爲百戶以武功世其家四傳至太僕寺主簿英始以文學顯科甲相繼國棟有勇力成雍正甲辰武進士時喀爾喀地方大興屯田謁選者皆畏避國棟請自備鞍馬効力授拜達克守備星夜馳往其憑限未半已抵烏魯雅蘇台謁上官駭其驟至稱之曰飛將軍拜達克屯地亂石橫野並未成田國棟親督率軍民闢草萊定疆界勸樹藝土膏盡出田以沃饒奉檄與準噶爾清界領五百軍夜渡瀚海準噶爾兵屯木壘烏蘭烏蘇國棟分兵五隊伏羲路外一人一騎家丁一通事一捧部檄入場灘相見不卑不亢議遂成界各守其舊馬公保舉臺莊遊擊引見時因領班之副將王國寶舉弓落設同班俱改衛

缺補湖廣荊州左衛守備初莅任有水災親查戶口借給籽種軍民皆安荆之旗丁多大戶嚴以御之嗣以火燬糧船被議羈楚省十餘年始歸乾隆十七年以原銜註冊家居卒年八十有四

吳汝惺字匪席州學諸生先世蒙古人元末官陵州達魯花赤有德政遂家焉祖廷蓋父瑜俱廩生歷世以易經名家著有易學露機圖說瑜以傳汝惺汝惺逐爻體驗隨位所居以求寡過復搜集衆說四十餘家批註闡發各極精深名曰吳氏易說見四庫全書又著照心鏡居家雜儀稿藏於家子楚椿另有傳楚幹乾隆庚辰舉人

李世保字滋園號柳亭天性穎異幼師王鷗亭先生鷗亭師趙秋谷宮贊其詩文俱有根柢乾隆丁卯舉順天鄉試第五人辛未與

德縣志

卷十

人物志 耆英

四十

挑授武進知縣歷擢雲南大關同知剛正愛民不阿俗亦不媚人罷官後久羈於滇惟以書畫詩酒遣日蠻花犵鳥佇興成章無哀怨憔悴之響識者謂得力於詩教者深故能溫柔敦厚風雨急而不輟其音也書摹晉人兼仿蘇黃畫與高西園朱導江齊驅女迪安知書善鼓琴尤工繪畫詩詞頗有其父之文采云

魏爾秀字天毓乾隆庚辰舉於鄉連上春官不第怡然曰吾其爲力田老乎布衣草笠隱於田間壬子無年出穀捨鄉里多免於流亡平生善教後進學者執經問難每立隴畔以受講解性坦易胸無城府不喜交富貴惟以品節自高進士封大受銘其墓稱爲隱君子歷下唐雪懷寫灌園授經圖以贈之孫開均官徐州衛守備豪爽有才略嘗傾金脫人於難名聞江表

呂東表字書佩號雲谷生而英異八歲學詩卽有有情明月圓如鏡
屈指今年第四回之句未弱冠補博士弟子員乾隆戊子舉於鄉
壬戌成進士榜下卽用知縣得山西猗氏縣猗氏古郇瑕地也俗
獷悍號難治闕堂鬧縣之事不可屈指計東表甫蒞任適值亢旱
籲於上官得所請頒賑於鄉復捐俸施粥全活者以億萬計居官
儉約如寒士體恤民隱疊疊如不及理訟明斷如神民不忍欺有
白面包老之稱丁卯夏鄰邑萬泉因丁徭之故激成民變城閉已
三日矣太守往諭之民執之詈且走已出南門將登山適東表以
稟事至衆曰賢父母來矣羅拜於前以訴東表曉以大義欣然聽
命炷香送太守還四門盡啓紛紛者各鳥獸散迨上官勘亂萬邑
居民不至玉石俱焚者東表之力也歲庚午以應付餉車遲罷官

德縣志

卷十

人物志 耆英

四十一

居民舍百姓送粟米柴薪者羣然爭赴門外常滿辭不獲已辛巳
高宗幸五臺趨熱河接駕蒙召見有紀恩詩二章居鄉恂恂不以
賢智先人與同年宋弼相友善每與唱和晚年悉焚其稿惟學詩
漫草古人格言四卷尙存子音正字襄宸天性肫篤幼嗜讀長入
庠食餼爲一時名宿教授生徒皆勗以身心性命之學故遊其門
者多成爲名儒良吏晚歲貢成均好學不倦接人如春風煦物見
者皆怡卽市井桀驁之輩互相爭鬪者遇之皆肅然起敬人皆比
以漢之王烈云

宋弼字仲良號蒙泉鄉賢宋公性後裔也曾祖炳明崇禎丙午舉人
以刑部郎中補肅州道祖兆李康熙丙寅拔貢鄴城教諭父來會
癸卯拔貢世傳家學弼性耿介好直言乾隆乙丑進士授翰林院

編修分纂文獻通考癸未大考原品休致諸城劉文正錢塘梁文莊重其文章品行奏留在館轉贊善出爲甘肅鞏秦階道弼訪問西羌風土物產古人所未及者綴詩記之凡百篇其留心治道如此伏羌徽禮等縣地震親行勘賑惠澤均霑民皆歡頌陞授陝西提刑按察使治案牘夜以繼日不假手於幕友每出行禁供應御下以嚴暇則讀書吟詩以怡性情其淡泊寡營又如此著有詩集八卷思永堂文稿四卷州乘餘聞安德詩搜等書王學士鳴盛詩序謂蒙泉與王阮亭同郡宋荔裳鄰郡然絕不撫拾鄉先達片語別有一種意趣幽秀獨出娟好避羣蓋先生豪爽傾瀉其胸中却自有難與俗人言者捉鼻而哦仰天而悟託物寄興雅近義山若夫壯浪縱恣一放都盡其優爲之而不屑轄而束之待人自思至矣

德縣志

卷十

人物志 耆英

四十二

或偶爾興發芒角迸露精光英氣有凸出紙墨間射人百步外而不可逼視者風格雖似王宋實非王宋讀其詩者可以得其厓略矣

田徵輿字孟扶號清漪晚號香孤同之子性明達無俗情束髮授書卽酷嗜韻學因體質孱弱不耐舉子業遂專攻詩詞旣本家教復宗漁洋詩主韻格不事綺靡詞亦韶秀直逼稼軒書法遒勁尤工鐵筆刻有豆花書屋印譜名重一時直督方觀承聞名使幕友張鳳孫索刻玉章具道夙慕之殷欲聘居幕府遇機保薦雖感其誼而捷徑實弗屑也其淹雅之懷孤介之操可謂善承家教者矣子靖澆澄二人均貢成均職任司鐸

吳楚椿字蔭華號八千幼孤力學承教於丁萼亭先生讀書善體會

乾隆辛酉舉於鄉南宮屢躋選授浙江青田令愛民如子多惠政六載告歸課徒以自給人稱之曰青田先生於經書多所箋釋更留心邑中掌故著有州志擬稿清乾隆間修志時多採用之

趙大經字叔常號春礪念曾子乾隆戊子亞魁性豪邁尙氣誼詩文援筆立就悉協規矩字學米襄陽鄉前輩盧雅兩宋蒙泉咸器重之壯歲遊京師名動公卿與董文恪紀文達尤深文字契後由鄒縣教諭歷知直隸樂亭涑水武清等縣事武清地瘠民貧苦於徵調大經潔己愛民民困乃蘇尋以事解任羈留武清邑人饋遺薪米凡歷八載以其母歿於上元節前爲罷燈市時去官已六年矣其政績之感人若是服闋改官山西襄陵縣循聲尤著卒於官邑人咸厚賻焉孫葆赤字太初嘉慶丙子舉人有詩名次孫後素另

德縣志

卷十

人物志 耆英

四十三

有傳

羅以深字淵碧號樸園增貢生階蘭比部之仲子渚亭刺史之介弟也少慧而學早就屢躋名塲遂隱居不求仕進家有舊園亭稍加修葺不爲侈靡臺榭花竹疏落有古致名曰樸園結小雅詩社於其中與金谷村李秋厓宋蒙泉諸名流相唱和文酒高會殆無虛日尤肆力於古文多得沈椒園先生之傳授著有樸園片紙集子奎章字東璧乾隆戊子舉人詩文具有家法

呂占建字寧侯號春山天資英邁才識過人詩文豪宕有奇氣性肫摯敦孝友幼妹爲繼母所鍾愛適隔縣母常思念占建移家相從者幾二十年繼母歿始歸里乾隆戊子舉於鄉以大挑分發安徽歷知五河英山等縣署泗州牧所至皆銳於任事不辭勞瘁其任

五河也接辦賑務親赴災區稽查戶口較前任所查應賑外增至萬餘口銀米躬爲給放闔邑賴以無飢其在英山也以恤士愛民爲急務興學校勸農桑事之大小無不治曾充江南同考官所取皆知名士其在泗州也值黃水泛溢地處下游壞民田詳請賑卹復恐緩不濟急捐廉備餽餉遣親丁以小舟給散全活無算去官囊橐蕭然不能作歸計所歷各縣士民爭先資助回里後教授生徒依然儒素之風著有汲灌堂集弟占霖號春園乾隆乙卯副榜清廉如其兄

馮淑清字性之號春臺大木元孫家學淵源才華雋逸乾隆丁酉拔貢庚子登賢書刻意聲律所造獨深雅兩蒙泉而後提倡風雅者首屈一指然負郭蕭條硯田爲業晚年司訓商河不數年又失明

德縣志

卷十

人物志 耆英

四十四

歸里佗僚無聊費志以終良可慨歎

梁鴻翥字志南家貧好學不屑屑章句每治一經案上不更列他書遇有疑義積日累月思之必得解而後已所著周易觀運尙書義書經續解春秋辨義春秋義類及儀禮綱目詩經周官禮記辨義共計近百卷皆未刻歷城周翰林永年收藏之撫其兄之遺孤教之甚嚴而恤之甚至姪嘗患癩茵蓐皆親爲澣濯性狷介友戚周以財物修脯有餘必償之以優行貢成均年五十九卒無子優於學而齋於遇誠通儒也後之人必有欽其經學而私淑之者

李庭燦字儀矩號肖亭棟之子也其家自泰雲先生以來喜交遊尙義氣德當南北之衝士大夫道此者多歸李氏庭燦童而習焉所居故有見可園樹石皆舊庭燦重建矩亭於園其字儀矩號肖亭

儀泰雲而肖之也益植嘉卉賓朋過從無虛日性通諧樂易不爲拘拘態能稱說古人事且多識鄉閭舊聞考故事者藉爲獻嘗遊維揚姑蘇武林以暢其懷抱賦秉強固晚年洒脫不羈自號頑禪老人頑言其堅禪不繫也年六十七卒此所謂隱君子者歟

李 錕字韜鋒號青岑半檐居士其別號也童年入庠食餼學富才高風流蘊藉冠絕一時乾隆丙辰年十七應省試闈中擬元十餘日已登草榜而循失之嗣是屢薦屢擯牢騷抑鬱四十八歲而卒州前輩李興安公爲斯文宗匠嘗云吾生平有不可解者三歐陽公不能四六文海棠無香李韜鋒不第也擅濟南名士之譽含荆人抱璞之冤生前落落顧可使死後泯泯乎著有半檐居詩一册盧蔭惠字東橋號荷亭雅雨先生之孫性鈍而學勤人一己百不厭

德縣志

卷十

人物志 耆英

四十五

也幼從膠州張雲岫先生讀方之宜興儲氏昆季謂六雅由鈍而入蔭惠似之乾隆丁酉舉於鄉庚子成進士以知縣歸班銓選四川巫山縣嗣調河南澠池縣居嶠函之間路當川陝衝瘠而苦甲於豫政崇寬簡與民休息壬子征廓爾喀之役大軍過境山路袤長再宿始出籌畫供饋寧稱貸無擾閭閻去澠時紳民咸頂香送之迨任偃師邑爲其先人舊治多惠政郭溪築亭爲當年勸農休息之所邑人所建生祠在焉詣祠謁拜舊德新猷興人大悅衆牒上官請以蔭惠祔祠而格於例嗣調孟縣孟固巖邑也剛勁好鬪畏之以威懷之以德治之五年孟人向化所謂久道化成者此也後以內艱旋里屋僅五楹風雨晦明讀書嘯傲於其中澹泊自甘不復作出山之想矣嘗以侍親疾精研歧黃和藥施濟全活無算

轉成醫國之手鄉人稱盛德焉

李有基字黻昇號東圃樾孫少負異才博涉書史多識掌故之學古文宗法唐賢醞釀之厚浸乎西漢詩則以意獨造絕無規模性沈毅簡默見義勇爲讀其文誦其詩可以覘其人矣乾隆乙酉以第一人舉於鄉辛丑成進士授福建連城令甫蒞任以興利祛弊除暴安良爲己任不數月邑人有政簡刑清之頌前令欠倉穀不能償有基憐其貧困慨允代償之事未竟而卒於官大府留其二子鋼錄不遣兄弟泣請於府門者累日鋼獲歸留錄爲質三年鋼罄產赴閩繳款乃得與錄歸鋼中乾隆癸卯舉人官蘭山廣文錄中嘉慶丙子舉人性古傲有父風其族有鬻女於匪人者事甫定未嫁也時錄設帳鄰邑聞之趨歸以館金畀之退其婚別擇良匹鄉里高其義爭相傳誦其家教可知矣有基所著州志考異已刊行又披褐吟沽上吟掘得集南遊偶吟周易義象合纂廣川客問續問等書稿藏於家

金杞 金樵 金檢皆伯精先生之曾孫也金英其元孫也家學相

承世德濟美杞字梓儔躬行孝悌得父母歡心歲疫侍母疾衣不解帶者數十日兼爲弟妹調藥餌俱獲無恙友愛諸弟時以一體之言相勗勉疾世之分形私己若忘其身爲同所出者其弟姪輩一堂雍睦薰陶於杞者深也樵字采若號樂山孜孜於學有遠到之思性好施與見人有美行必加意曲成之口不言人過族有貧而私售墓木幾罹於法者樵以己產保墓木而免之與子姪言先人德澤前輩典型娓娓不倦聞者比之陳太邱云檢字斯循號松

居雍正乙卯拔貢敏而好學讀書有真得會心處必手書之著有毛詩正韻周易輯徵劉蘇村謂其靜穆渾涵有粹然學者風年四十七而卒論者惜之英字谷村少孤補博士弟子員日事母不稍離左右母歿受業於趙館山績學力行著有遺安堂詩集不求人知人亦罕有知者孤芳自賞而已杞子述藩乾隆丙子科舉人樵子紹藩歲貢生皆克守家風弗替

盧蔭溥字霖生號南石雅雨先生之孫也乾隆辛丑進士翰林院編修與修三通及河源紀略充翰林院辦事官擬進文字多出其手由鴻臚寺少卿擢至兵部左侍郎是時豫東及南山匪徒相繼蠢動蔭溥贊畫得宜事平擢禮部尙書歷任吏戶兵刑工等部尙書晉協辦大學士授體仁閣大學士總理刑部有年平反多案以疾德縣志

德縣志

卷十

人物志 耆英

四十七

致仕重赴鹿鳴宴卒京邸諭祭再三贈太子太師諡文肅入祀賢良祠國史有傳子本字子中號泉之嘉慶癸酉恩賜舉人戶部廣東司員外郎淹通經史謹守遺規器重播與矣

盧蔭文字景范號海門雅雨長孫性沈邃學問宏通乾隆己酉成進士歷知安徽建平舒城涇縣等縣事建平民多好訟積案如山下車後悉爲訊結判斷如神刁風漸息涇縣俗好溺女雖建有育嬰堂奉行訖事而已蔭文令乳媪每於月朔抱嬰來署察其肥瘠以爲賞罰孩提得全活者甚衆壬子分校江南得士最多如潘世恩以殿撰躋端揆其尤著者也戊子丁祖母憂去官民皆遮道攀轅焚香泣送不忍捨服闋補舒城知縣前令催科迫切民不樂輸聞蔭文好官將至則踴躍爭先完納蓋仁政之名孚於民也久矣而

蔭文賦性恬退年四十七卽告歸不復出優遊林下三十餘年居鄉有任恤之風處昆季篤友愛人皆稱盛德焉孫光燾以附貢鹽大使待銓和霑近人戚里有貧乏者慷慨推解無吝色友愛尤篤鄉里德之

盧蔭長字西有號怡亭雅雨季孫乾隆己酉拔貢候選鹽場大使澹泊自甘無意仕進勤儉治家日漸豐饒而任郵鄉族從無吝惜之心子枚字條岑號琴齋道光乙酉拔貢壬辰舉人工部屯田司主事性寬和與人無忤誘掖後進以博文約禮相期許衆咸心悅誠服嘗自書銘座右曰節飲食慎起居謹言語戒憂鬱內念不生外境不受無心於事無事於心其所養可知矣卒之日靡不感慨而流涕焉

德縣志

卷十

人物志 耆英

四十八

封大受字仲可號荻塘諸生元豫之孫也元豫性孝友謙退嘗脫弟於難平易近人鄉里推重大受中乾隆庚戌進士博雅工詩究心說文弱冠名噪海右登第後待銓縣令竟不謁選家居授徒卻其脩脯貧者兼資給之多所成就故城賈方伯臻其高弟也平生謹恪自持不臧否人物詩書外無他好孫觀察星衍督糧山左重其學欲一見不可得孫益重之一時巍然負山斗重望碑版之文多出其手所著德州文撫詩撫柳舫日鈔柳舫集印邑里文獻搜探略備年七十一卒於家

田瑛字英玉號懷雨太史兩來元孫性謹飭而學閎通詩文韶秀中乾隆丙午鄉榜庚戌應試春闈家况清貧親族集資隨父北上行抵潞河晚宿客邸聞婦女哭甚哀詢知有鬻女葬親者父子議

以川資四十二金傾囊贈之俾免離散之苦及中式名次與贈金之數適相符其亦神乎哉書曰作善降祥信有徵也殿試用爲內閣中書舍人屢充鄉會同考官國史館分校截取同知未掣籤而玉樓赴召矣惜乎未竟其才子本治字景迂善書畫以明經終謝九錫字綸齋號雲村郎中重輝元孫也生而穎異承其家學十五歲以第一人入膠庠屢舉不售遊學四方肆力於諸古文詞詩各體皆工尤長七古識者譬之蔓野叢林警風來宅時人以爲篤論家素貧性耿介不妄取予由歲貢補清平訓導歲餘卒於官年七十四著有南阮集行世古文稿四言史藏於家

溫 憲字郁亭蘇祿東王後裔守墓居德性警敏好學與吳楚椿兄弟比鄰爲莫逆交以學問相切磋名噪一時乾隆乙卯舉於鄉屢

德 縣 志

卷十

人物志 耆英

四十九

躡春闈以大挑分發河南補授修武縣知縣甲子鄉試充同考官稱得士焉善治盜屢獲鄰封要犯保以知府升用後丁艱服闋調省安徽歷權池州寧國徽州安慶等府事調補鳳陽府知府所至之處明能察吏勤能愛民循聲丕著以卓異升任廬鳳道一時有循良之譽

董鑑道字德新號文波漢廣川伯仲舒之裔也先世居浙之會稽曾祖良柵康熙丙辰武進士直隸蔚州路參將祖士燦國子生父理著太學生遊幕山左入德籍鑑道己未恩貢候選直隸州州判天性孝友讀書貫通大義尤敦尙廉潔之風屢躡名場絕意仕進閉戶研經刻苦自勵事親能先意承志雖中冓廁必親爲浣滌無稍間教養弱弟至成人猶指授不已嘗謂人曰吾一日不讀書自

覺有愧於心也尤愛讀春秋繁露曰此吾先人之著述豈可忘祖德乎後學一經指導率皆成名居鄰永慶寺寺內有脩築事擬請有重望者理之敦請再三不出僧衆環跪懇求始允其請其審於出處多類此家教尤嚴內言不出外言不入有華原柳氏之風焉年七十二卒子上淳附貢生上瀟軍功六品均能世守家學

呂崇修字筠浦乾隆甲寅登鄉榜官城武訓導滑賊李九成之亂曹州羣賊猝起名城多不守時城武兵僅二十人知縣又惟怯無能爲崇修與官紳盟募民兵數百授以方略晝夜乘城賊至文亭山距城里許火光如長蛇崇修激勵士卒勇氣百倍賊偵有備會引去事定論功加一級賞不酬功崇修晏如也道光壬午成進士歷知直隸懷來遷安高邑等縣居官廉靜慈祥所至皆以賢稱有保

德縣志

卷十

人物志 耆英

五十

安令者故與崇修善爲仇家所中幾不免崇修解金脫之於難其在高邑也慕趙忠毅公爲人求其遺書讀之復禮遇其子孫志趣可想見已崇修貌魁岸品學冠一時至老不廢讀官畿輔十餘年俸金皆散之所識窮乏而自奉儉素不異爲諸生時年六十餘卒於官宦囊蕭索所遺惟破屋數椽故書數篋而已著有西園集子載字厚齋歲貢候選訓導孫青雲另有傳

蕭與澄字練江號秋查韓坡先生後裔祖天培官縣丞父欽候補光祿寺典簿與澄嘉慶辛酉拔貢性敦厚喜閒靜與人無所臧否而意氣自負不屑事家人生產家無儋石之儲客至必留飲卽典衣不惜貧者乞求必罄所有以予之好吟詠往往獨居俯仰上下有千秋之慨著有秋查遺詩一卷封宗翁爲之序子之桂字月樵號

蓼懷恩貢生幼失怙恃中年以後坎坷益甚然通經好古淹雅能文從學者衆爲之講貫經史旁及詩文就其才之所近以裁成之均能各樹一幟以表聲華詩力追盛唐格調獨高尤工書法一時碑版多其筆蹟人爭寶之

封大本字授曾號山木嘉慶辛酉舉人天姿超越博覽典墳過目輒不忘後從邵二雲先生遊以詩古文詞自勵出筆如天馬行空不可羈勒一代奇才也天年不永三十四歲而卒士林惜之著有窺園集病得集子其澗字曉江恩貢生詩詞具有淵源尤精青鳥之術嘗建議九達天衢坊下水宜疏通二郎廟古刹振河閣皆宜修復文星乃耀人多韙其言以衆謀未成僅溶環城水道自是州之科名稍振亦可云有驗矣著有勗齋詩草

德縣志

卷十

人物志 耆英

五十一

李清渭字吏白少負英才補博士弟子員旋食餽父早卒事母以孝聞家綦貧賴筆耕供菽水每自塾歸必將所見所聞之事縷述於母前母聽之喜形於色數十年如一日與同里封宗翁趙葆赤爲友以道義相切劘當時均有碩儒之目嘉慶己卯舉於鄉官東阿學博

李漸磐字占吉性孝友孔武有力素好騎射從父讀書學爲文應童子試未售廼改考騎射得入武庠父老儒雅不喜武事遂居菜圃中漸磐肆力無少懈嘉慶丁卯武舉戊辰聯捷進士授藍翎侍衛父始喜令家居焉外任直隸宣化營廣東肇慶營守備以海防功叙升浙江江寧營都司轉補楓嶺營遊擊疊獲海匪出力升授寧海營鎮海水師營參將道光中海疆多故浙閩總督葉奏調杭州

錢塘水師營平陽協副將旋以豫省河北地方教匪肆擾奉旨調陞河北鎮總兵官藉資剿撫生平所欽佩者戚武襄公兵書極力研究頗有心得故所向克建奇勳以歲入廉俸輒濟戚族中之貧乏者並不計及家人生產其器度閎深如此故雖建牙開府而洵有儒者氣象子廷傑州學生精韜略善詞章文武兼備雅有父風

封宗良字弼亭鄂亭之介弟也少警敏勤學好問博通書史以經訓爲菑畚以文章爲性命嘉慶癸酉拔貢舉人庚辰成進士登第後淡於仕進以味道自娛與兄鄂亭晨夕談經怡怡如也時與田夫野老相酬應優遊林下心意自得卽凶頑愚戾之夫一相接洽無不心悅傾服和光善氣有感人於不言之表者時州侯某公將以

德縣志

卷十

人物志 耆英

五十二

德州改爲直隸州詳稿已成商之於宗良宗良曰吾州原係直隸州雍正三年改屬濟南復舊亦可然恐旣改之後奢華之習一開子弟漸染於浮薄而敦厚之俗變爲澆漓矣仍舊貫如之何事遂寢一言之出有關於人心世道類如此後終不仕卒於家

昌伊蘇字樸園滿洲正黃旗人德州駐防姓王氏忠勇多智謀嘉慶丙子武舉庚辰成進士殿試一甲一名授乾清門頭等侍衛歷官四川夔州協督標中軍協陝西潼關協副將甘肅寧夏鎮西寧鎮河南河北鎮甘肅河州鎮總兵陝西固原提督直隸提督是時承平日久習俗所趨有文恬武嬉之弊雖大僚如督撫提鎮於國事亦奉行故事而已惟昌伊蘇所至之處必周歷其山川形勢阨塞險要擘畫運籌靡不周備由是名顯中外成帝聞之撫髀稱善將

調京大用會福建臺灣郭崇高劉分夏等據勢背叛官兵屢敗朝廷以爲憂乃命昌伊蘇統兵征之賊聞昌伊蘇至皆膽寒未三月渠魁皆俯首就擒遂命鎮臺灣而昌伊蘇亦積勞成疾矣乃優詔命回籍調養道光三十年成帝崩感知遇之恩哀痛過甚遂卒朝廷聞之卹贈如儀子孫翹楚均能世其家孫彤書光緒辛卯舉人

趙任字肩吾父如房邛州判官任年十七喪父貧甚居草廡下讀書恒達旦飢則飲泣恐傷其母也輒朗朗讀不已從名儒呂音正學嘉慶辛酉拔貢庚午登鄉榜癸未成進士之官皖省貧不能行友人爲治裝乃行至皖試知含山尋以丁內艱歸廬墓側百日服闋入楚攝光化篆甫八閱月廉能聲大著調竹谿令竹谿處山中篁深林密夙稱盜藪向一達者盜魁也流毒鄖荆間官軍屢捕之

德縣志

卷十

人物志 耆英

五十三

不得任下車易樵人裝微行懸厓絕壁中得其踪遣健僕率弓兵數人授以機宜直入其巢繫之歸臥堂下一達瞠目視任曰不圖今日壞汝書生手送武昌伏法嗣獲其餘孽數十黨盡散民始安枕會湖南騷亂作大府素銜任不曲事檄督造軍器限五日內任三朝就壬辰竹谿無年民鮮食死者枕籍任請賑於大府不報憂憤成疾告歸行過江遇竹谿流民相向泣抵家僦屋而居未幾卒

爲諸生時館景州某宦家村有少年生因貧經敗廟中任救之甦教以讀書不索脯後少年生舉孝廉官至顯要

陳信南字紀堂性純篤兄弟六人幼則同讀長則同居母氏田治家嚴肅課子尤勤每晚侍奉時必將師之講習友之言論婉婉以告是則獎以果餌非則口講指畫援古證今以曉之每至更深方令

休息十八歲遊庠旋以優等食餼屢躋秋闈而好學不倦惟思博一第以上慰母心後以歲貢選授濮州訓導輒思攀輿迎養以母年老未果迨聞病篤以繫匏未及視殮爲憾服闋後補樂陵縣教諭遇恩封贈而老親已歿終以罔極莫酬爲一生恨事每讀蓼莪之詩必掩卷涕零信南可謂能盡孝道者矣

田 晉字錫庶號裴園山蓋後裔由廩貢考職州同性沈毅寡言笑讀書過目成誦早歲食餼與從堂兄弟同居四十餘年重孝義也有蘇州吳姓者自津賃舟歸里至德貲缺晉遇諸途見其狀異之人告以故遂親赴河干察實按途助貲使歸吳泣求姓名竟不之告亦未嘗向人道及族有負人債者將訟之官晉止而代償之更有赤貧者數家按時周卹無吝色尤好揚人之善成人之美鄉里

德縣志

卷十

人物志

耆英

五十四

皆高其誼子元春字寅卿道光丙戌進士知甘肅平羅縣多惠政以辦理青海後路軍務功叙升知府後以疾歸教諸弟均有文名趙 廓字增祺歲貢生候選訓導性忠誠沈默誦五經貫澈註疏教授生徒講求經術以明體達用爲根柢一時學者皆有正士端人之目當道咸時白蓮教起其燄甚熾習其教者多罹法網而愚民惑不畏死廓甚憂之爲之演講利害雖風雨炎寒不避也或刻印淺鮮文字勸人以忠孝節義等事使之易曉易能而後已可謂有功於名教者矣

趙後素字元禮號香巖一號聞聞春礪先生之孫歲貢生世其家學幼好吟詠長與蕭練江先生相切劘詩酒倡酬間出雅謔往往一座盡傾而避俗若浼取與不苟蓋自處於狂狷之間者也著有懷

戎存草屨提居草

封宗翁字鄂亭早歲知名庠序文行並優嘉慶丁卯副榜道光乙酉登賢書連上春官不第以大挑選棲霞教諭不就日與其弟宗良談經講易研求性理之學書澹泊明志二語於座右生平無一字干官府知州馮公春暉宗翁房師也延入署教其子不受脩脯爲之剖解羣經曷以立品敦行之道馮益重之詩古文詞皆工然碑銘壽序無幾以謂非所深知不欲輕爲揄揚也年八十餘猶爲諸孫改削窗藝其時已失明數年令諸孫更代執筆口授之須臾已完數藝點石成金矣著有敦悅堂稿行世

林蔚字茂修性慷慨好慈善父歿擇地卜葬及啓穴見一棺地師曰加諸上可也蔚不可曰所爲卜窀穸者安先靈也已得安而致

德縣志

卷十

人物志

耆英

五十五

人於不安豈義之得乎卒封而祭之另擇他地以葬其父子大木字東軒咸豐癸丑進士宰豫之中牟有政聲人咸謂食其先德云盧慶綸字理堂號伴鶴大學士文肅之孫性安和學問淹雅道光乙亥欽賜舉人辛丑成進士殿試二甲翰林院庶吉士武英殿協修散館授編修歷充武英殿纂修國史館總纂功臣館纂修文淵閣校理在館時每遇編纂擬稿進呈御覽多合上意其文章具有淵源精理湛深妙緒泉湧眞閭苑才也惜乎玉樓詔促天不永年五十二歲而卒

武得和德州營候補把總性眞摯勇於任事道光某年歲除日領餉回渡河見一車駐河干觀者如堵復聞船上婦女哭甚哀詢知爲以女抵債車來接女臨行不忍永別而哭耳得和聞之惻然問其

欠數乃適與所領之餉符遂慨予無吝色並焚其券而歸抵家以告其母母曰善當自勉之凡事有天知也子殿元以武魁官單縣營守備孫士林武庠生官武定營遊擊記名副將人以爲好善之報云

于 桐字安巢號敬亭廩貢生官大理寺右丞性情純樸輕財好施善飲工曲陶然自得未嘗有戚戚容其先人雲門者卽嗜韻語其配張趙亦皆能詩雅有康成家風著有挹翠山房遺稿孫紹先字竹園附貢生溫文爾雅詩工咏物不涉纖巧饒得宋賢遺響可謂學有淵源矣

孫開機字省菴號東村天資靈敏束髮受書卽以漢史八家爲根柢弱冠食餼庠序中錚錚有聲道光丁酉拔貢己酉舉於鄉操守謹

德縣志

卷十

人物志 耆英

五十六

嚴淡於仕進尤於義利之界真僞之途辨之詳盡其風規可想見矣子士鼎優廩生教授生徒亦以品學相期許能不墜其家聲孫開寅字協恭號小正一號虎門莪山先生曾孫州諸生性孤峭與人多落落難合馮春臺謂其清修似鶴不可得而親疏者也然遇知己則傾廩倒困惟恐不盡詩文根柢家學皆有法度尤深傳注之學而不入時眼屢試棘闈終顛於緋衣之目雖簞食屢空晏如也安貧樂道鄉里稱之

趙 怡字次和元爵子弱冠入庠品學兼優學官牟曰錡單維聞之學使以其名達於禮部擢爲祭酒以增貢生援例官候選布政司理問所居村瀕古黃河爲東路衝衢其父元爵造有長橋以濟行人怡恐歲久傾圮墜先人之志也不惜重貲歲歲修葺每遇歲祲

出穀濟鄉里往往至數百石周人之急慨然無吝色有偷兒夜入室予以金勸之改行其人卒歸於正鄉人至今稱盛德焉

呂朋錫字珍莪占建孫優貢生候選訓導端謹仁厚經術湛深啓發後學循循不倦從之遊者俱能明經致用一時英才俊士盡列門牆論者媿之晦菴鹿洞子靜鵝湖不爲過也輕財重義敦宗睦族親友之困阨者慨助無吝色雖屢屢不厭也其氣度之淵涵類如此洵可爲後世之楷模矣嗣子松齡字夢鶴增貢生飫承家教與人無忤有先人忠厚之風孫纘祖字禹臣增生精歧黃

馬百適字凝之號野坪國棟曾孫廩貢生自幼卽以孝聞母病嘗露禱中庭每念母氏茹苦上節孝事實於所司得旌如例母爲孫通參我山公女孫通參文名滿海內歿後家中落爲刻其遺集今所

德縣志

卷十

人物志 耆英

五十七

傳鶴侶齋詩文是也性縝密不談人過義所不可無少阿或有干故人之顯者持多金丐爲之地固辭終弗洩其事見人之阨必曲爲周恤之咸豐甲寅髮匪肆擾州侯委辦團練境賴以安事定授武城縣教諭無干越無委惰先行後文嘗曰學官雖閒曹自有當盡之責若闕茸自安何以官爲旨哉斯言豈獨無愧於學官哉三年引疾歸卒於家子均慶字憲可庠生早世次洪慶字葛村同治甲子舉人另有傳次崧慶字翰卿廩貢生修學宮積倉穀人皆稱之次湛慶字露亭增貢生孫翥字右軒均慶子也同治辛未聯捷進士權知河南滎澤縣事值歲歉賑急勤勞民免餓殍受知於涂大中丞題補鎮平鎮平故巖邑盜藪也彈壓撫綏不遺餘力勤聽斷絕苞苴尋以事去官邑紳張化棠等爲建去思碑以表之次孫

翹字季騫湛慶嗣子光緒丙子聯捷進士丁丑補行殿試以內閣中書截取同知分發四川代知長壽縣事任理番廳撫民同知升用知府勤慎耐勞民懷其惠語曰積善餘慶信有徵也

史兆麟字夢祥性英爽膽識過人咸豐庚申考取恩貢以教職待銓丁巳歲捻匪北犯滋擾直東兆麟奉命辦理團練迭次出力魯撫丁保以知縣升用並加同知銜時以臨邑陳團總冠甲修城違制僧親王逐捻駐德聞之以爲大逆不道卽欲發兵剿除之邑侯張公應翔邀兆麟與之商謂果以大兵臨之則數百里生靈均受塗炭欲使君往見陳團曉以利害俾其解甲人民苟免此難則幸甚兆麟慨然曰苟有益地方身且不惜卽以身家保其不反張公肝膽照人亦以全家保之遂選團丁數名卽時而往車入刀林者四

德縣志

卷十

人物志 耆英

五十八

十里始抵該部以大義諭之多方譬解陳團感悟卽行散隊歸農冠甲隨兆麟來德謁王謝罪從此雲斂風息數百里幸獲安全兆麟之力也其豪爽能事多類此至其辦團時指揮教練挑濠築壘必首先領導不辭勞瘁雖年逾古稀精神矍鑠論者比之馬伏波云

羅含章字錦亭號梅嶺候選布政司經歷性慈善好接納祖遺園林日與諸文人飲酒賦詩於其中以相酬唱桑梓遇有荒歉與親族之貧乏者必竭力周恤之無吝色德容鄉黨稱善人長者遐邇無間言盛德之及人遠矣

趙樸字敦夫號漢崇先世青州益都人明初以世襲德州衛指揮因家焉世多讀書代有聞人至樸尤好學攻苦歲時不輟咸豐戊

午登賢書同治庚戌成進士授比部河南司主事以賢明稱屢充鄉會試同考官號稱得人嗣陞吉林理刑司官斯土者往往因以爲利樸乃廉潔自持杜絕請託讞獄多所平反遇事輒執法以諍上官疑有賄囑怒甚將挂彈章旣而察其聽斷明決乃轉相信重倚之如左右手不期年政簡刑清士庶咸以趙青天頌之秩滿行將擢遷適聞父亡信一慟幾絕遂病不能奔喪旋卒於任貧不能歸葬僚友贖金賻之始得歸柩瀕行民庶皆泣送爲之立德政碑云子吉生字藹臣歲貢生候選訓導善書法淵源家學造詣精純惜困於棘闈終身授徒以自給士林傷之

魏來清字鑑泉性通亮見義勇爲咸豐甲寅髮匪逼州境州侯令辦團練布置有方賊不敢犯境賴以安喜施與有負貸逾千緡者不

德縣志

卷十

人物志

耆英

五十九

能償或言其田宅可抵來清曰假人以財而謀人之產非義也立焚其券舊有宗祠捐祭田以贍貧族歲時合祭必聚族以享其餽餘其敦睦如此延明師以教諸子歸必問其所學出必問其所與遊橫逆之來勗以自反其義方又如此人咸謂積德所臻宜隆其報及仲子廼勳成進士然已未及見矣長子廼勛三子廼勳皆文學士克世其家

陳大業歲貢生候選訓導性孝友父母俱臻大年躬親奉養無不周備教授弟姪讀書以勤學篤行爲先務稍有曠閒必遭督責家僅中人產食指日繁大業總理周密習於勤儉弟大誥服官部曹入不敷出必資家中接濟歲需多寡應付未嘗缺乏平生布衣糲食澹泊自甘忠厚正直鄉里重之

封兆衡字夢禪歲貢生荻塘進士之從孫幼聞緒論故詩文皆有法度弱冠名噪一時小試輒冠其曹嘗試雪花六出賦短晝苦吟篇未成而日已夕不得已納卷出學使某公閱至探梅野岸輸他一瓣之多亟加稱賞竟得高錄人以比祖詠之賦終南餘雪云

李本根字務旃歲貢生選授汶上縣訓導蒞任後集闈學士子昂以敦品勵行爲本觀風試卷權衡悉當其材由是從學者衆晝開講筵精研道義夜則篝燈誦讀一堂鼓篋爭自濯磨文風爲之一振成名之士指不勝屈嘗謂人曰教職固屬冷官然所司者培文教敦士習也若遇事委蛇與俗浮沈豈非放棄職守乎吾深自惕焉兢兢者思盡其職耳非敢有望於他也卒於官年八十有七長子勳增生次子煦廩生三子杰歲貢生候選訓導均能守其家學

德縣志

卷十

人物志 耆英

六十

李元燿字耀廷歲貢生學問淵雅意趣清高性閒靜有元章好潔之癖紙窗竹屋灑掃精潔每花香酒熟邀諸名士觴詠其中以樂其樂與同里趙後素最爲莫逆馬葛村戎部曾師事之

馬洪慶字葛村號嘯崖百適仲子天資穎異博涉羣書由道光己酉拔貢入爲戎部主政同治甲子舉京兆試素嚴介不近紛華告歸林下精研身心性命之學肆力於詩古文詞一時從其遊者皆知名士尤留心邑中文獻搜求前賢著作彙集成帙仿山左詩鈔例人系小傳往哲遺型藉以流傳此次修志文獻賴以有徵者葛村之功有足多焉至其孝友之性仁厚之行最足稱者父嘗病日夜不能交睫與兒均慶迭侍榻前以手支眦父得假寐時許如是者旬餘兒子翥翺幼失怙衣食教誨撫如己子課之先後成進士州

諸生田昂病歿母老家貧洪慶存卹其家三十年無稍間有良家女爲人掠賣具價贖歸其家絕口不復言光緒丁丑歲大飢豫廉訪山來德查賑舉洪慶理賑務乞食者日萬餘人身坐乾風烈日中驗給籤票五閱月形爲之瘁福中丞潤重其操行每入覲過德輒訪諸其家僚屬因丐洪慶爲之地婉辭以謝終其身不以尺書干大吏士大夫由是益欽之年六十九卒生平嗜詩著有養知堂稿陵州耆舊集藏於家

陳大誥字荔邨生而奇警讀書聰慧絕倫諸史百家無不覽尤善書法初摹顏魯公沉思孤詣雖寒暑饑渴不輟也道光己酉拔貢朝考一等用爲七品小京官服務比部受知於昆明何桂清先生相與討論漢魏六朝諸名碑所學益精卓然自成一家一時名動京

德縣志

卷十

人物志 耆英

六十一

師爭相乞求今人得其手跡者尤珍如珠玉咸豐戊子登賢書逾年成進士殿試二甲六名以不阿權要未與館選自請歸部遂以主事用仍分刑部行走歷陞郎中調充寶泉局監督剔刷陋規幣政一新京察一等截取知府授江蘇常州府太守操持清潔整躬率屬未幾卒於任

郎峒雲字昇巖號翥卿咸豐辛亥舉人以大挑官魚臺教諭宏博善詩其自武城歸至別墅有卽景詩云半畝荒園晝掩扉菊花時節客言歸秋來三徑無人掃風裏開門黃葉飛風流自賞其爲人概可想見

李汝霖字雨巖星來先生後裔父英涵字彥三鄉進士以訓導待銓忠信端謹學業精純教子以義方有燕山竇氏之風規焉汝霖生

而穎慧讀書過目成誦承家學詩文俱超越羣倫咸豐戊午舉於鄉同治乙丑成進士以翰林院庶吉士留館授編修凡擬進文字多出其手歷充光緒丁丑丙戌等科會試同考官得人最盛後多爲名卿大夫者時有鐵網珊瑚之譽記名御史端正不阿有古大臣風而天年不永玉堂名流極惋惜焉子振鈞字蔚卿廕生歷知寶坻香河等縣事多善政有循良之稱

吳華年字呆仙號峻峰又號西萼高祖承緒副貢曾祖鍾巖廩生祖瑤歲貢父如璧庠生辦團練保五品銜賞戴花翎華年性孝友聰敏過人詩文書法均極超邁下筆數千言峭拔似蘇浩瀚似韓盤屈夭矯如天馬行空不可羈絆日能書小楷萬餘字清勁秀潤出入顏歐咸豐辛酉拔貢同治壬戌朝考覆試皆第一用爲七品小

德縣志

卷十

人物志 耆英

六十二

京官丁卯順天舉人戊辰聯捷進士翰林院編修提督廣西學政未幾以外艱回籍直督李文忠重其才奏請襄辦文案於政治戎機多所贊助時方籌備海軍事務尤能精心籌畫悉協機宜文忠極依重之服闋後保其才堪大用暫歸道員分直隸委用旋以疾回里卒於家年五十有九著有西萼詩草間多散佚士林惜之

張其恕字行之性倜儻好學不倦以廩貢應試北闈未售咸豐三年髮逆北竄據連鎮廷詔僧邸南下堵禦力助餉糈軍功議叙以直隸州分省補用六年分發到晉委辦釐金收復永寧州磧口釐金十年署忻州直隸州篆務甫下車卽將稅政悉除之州屬五縣貧寒舉子無力赴試捐廉助貲獲售者十餘人表揚極貧婦女之貞節者百廿餘口在忻數年勤政愛民風俗爲之不變紳民建碑以

誌功德同治元年題補沁州直隸州缺以水災請卹全活甚衆闔屬沾恩頌聲載道時值豫陝不靖羽檄紛馳從容坐理事無遺悞嗣以股疾告歸林下無意仕途矣日惟吟詩訓子課讀耕不問世事著有治家概要詩文遺稿隨手散佚無存子廷笏字楷堂增貢生選知河南尉氏縣特用同知直隸州光緒二年以開倉賑貧東撫額曰惠周井里廷簡字迪臣附貢生按經歷廷範字獻堂貢生直隸候補道北洋營務處兼辦緝捕營工程處等差孫家楨宣統己酉制科孝廉方正曾孫宗唐山東省議員子孫繁昌世食舊德矣

趙峰隼字掄秋念曾元孫同治辛酉壬戌併科副榜家學淵源以行誼文章相砥礪落落與世寡合古之狷介流也生平硯教四方聚徒講授一時朝華夕秀半出其門庚辰辛巳間安邱馮友文光祿視學粵東延入幕中深相器重重其文者重其品也二子皆諸生先相繼死嗣孫幼晚年抑鬱卒於里詩文諸作爲有力者購而藏之奉爲指南故著作半多散佚間存一二亦僅矣士論傷之

田 昂字伯頰號蓮舟山薑先生六世孫州諸生高才絕俗研精禪觀生平樂善好友每與同人講學論文能以清言發其微旨如公瑾醇醪令人心醉書學邢太僕尤工八分嘗輯易觸未刻已刻者重訂詩志一卷與馬葛村兵部爲契友葛村嘗曰伯頰與余交二十年敦篤可感每有著作必就商於余余賴以砥俗亦傾心嚮之俯仰今昔日中遂無此人可悲也夫

魏迺勤字吟舫學問淵博文章雄沈雋雅而性忠鯁有古烈士風咸

豐辛酉拔貢朝考一等用爲內閣中書同治壬戌舉順天經魁戊辰成進士以主事籤分刑部聽斷明決力持公道冤獄多所平反每值刑心輒怒然不安蓋哀矜之流露耳改禮部補精饈司主事遷印鑄局員外郎歷儀制祠祭等司郎中屢襄大行奉安升附諸大典禮儀無缺堂官重其文學多倚信之嗣任司務廳掌印郎中以備遇事顧問京察一等記名府道加四品銜擢御史掌江南道屢彈權要以直言敢諫不畏彊禦稱遇大僚營弊溺職勸法者無不周詢詳察得有確據便上封事絕不規避嘗以戶部書吏被搶堂官入告事列入彈章疏中有戶部非鳴冤之地司農非捕盜之官句措詞甚爲激切疏雖留中不發然從此直聲震天下矣其條陳時政公忠敢言類如此丙戌冬因某大吏以玉粒納倉大典伴

病不到具疏奏參權要亦加誹謗竟致左遷迺勸雖被貶譴而處之泰然日以詩酒自娛仕路之升沈若無動於中者由其養之有素也罷官後涿郡紳耆仰其品學敦聘主講鳴澤書院自此居涿講學暇則賦詩藝菊以遣興自顏其書室曰延壽客齋居涿十餘年甄陶多士成名者不可屈指計涿郡文風爲之一振己亥春抱病回里逾年拳匪肇亂兩宮出狩迺勸西望涕零憂憤交迫病勢加劇竟爾踏破蓮火復入洞天石室重徵秘笈矣崇祀鄉賢祠著有延壽客齋詩集行世子宗蓮字璠甫濟南警察第三區署長國務院法制局僉事次宗蓮字濂溪留學東瀛歸國後供職農曹出任鄂省實業廳廳長宜昌關監督

封嘉蕙字蘭橋天資穎敏博文強記經史入目心通少失怙遊蕭月

樵先生之門文摹成弘信手拈來妙合神髓以故採芹食餼如拾芥然同治甲子捷於鄉屢躋春闈淡於仕進以母氏操柏舟之節含辛茹苦三十餘年硯教奉母不忍遠離大挑請歸教職嗣丁內艱服闋選掖縣教諭尋歸道山士林傷之

盧光澍字雨亭號笠農夢山裔孫職郡司馬性情慷慨與世推誠戚族困阨力爲援助已無德色而人多感恩鄉里至今稱之子晉元字文階歲貢生詩文具有淵源頗得雅兩山人之奧後以秋闈屢躋絕意仕進村居金莊恒終歲不履城市閉戶潛修消遣詩酒亦隱君子也晉升字瑞符晉祺字介壽俱由增生貢成均

吳修鳳字夢亭幼負雋才爲詩輒多佳句旣長文名藉甚鄉試屢報罷遂棄帖括業肆力於詩六朝以下靡弗究心宗法尤在唐賢重德縣志卷十
人物志 耆英
六十五
游歷下句云干戈不破繁華夢流水鈿車滿郡城味外之味識者賞焉晚與張孝廉維崧爲唱和友孝廉卒釀貲刻其遺詩人以爲古道交著有林谷初稿續稿藏於家

馬 鬪字聲甫別號菊如子葛村先生之從子性洞達能文章博覽羣書尤工詩詞淵源有自也早歲以優廩貢成均屢躋棘闈就銓教職選授蓬萊縣訓導遵臥碑以端士習勤講學而培文風洵無愧於司鐸之職時宰斯邑者爲彭子壽循吏也著有絃歌集倩其題詞援筆立就詞曰承賜新詩卷屢開福星喜得照蓬萊一編當作循良傳好箇金針度我來彭極佩翮品學嘗以減明比之其操亮節可知矣鐸教餘閒廣納名流與彭明府子壽鍾孝廉西耘慕主政仙圃蕭廣文麗軒張茂才子翰會於積翠山莊談讌所及

皆寓箴規曾作五愛詩以自况其文采風流又可知矣官萊十數載以疾歸與同里陳子紱明經最莫逆時相過從一日陳來狀若遠行倏忽之間卽匆匆去亟詢其家已病革矣古人締交神明相通所謂下泉欸欸者非耶卒年四十五歲著有學無怒軒詩草藏於家子予沉字小魏性慷慨好施與鄉黨有事忠於人謀貧乏乞求樂於援助管理水官驛施粥廠每晨必莅廠監視施放風雪無間者十餘年監修廟學城隍廟青雲閣等工程必求料實工堅日久不敝監理恤嫠院安懷所體恤貧民靡不周至其急公好義類如此鄉人至今稱之

盧兆綸字繩甫德水先生後裔優廩生勤學能文見賞於州侯趙晴嵐趙菁衫兩刺史課士時文必首選許爲翰苑才果中同治庚午

德縣志

卷十

人物志 耆英

六十六

科舉人士林咸稱兩刺史有巨眼焉厥後屢躡春闈絕意仕進閉戶讀書吟詩遣性有隱君子之遺風

舉 廣字虞堂父早世事母及教養二弟一身任之家貧好讀書天性孝友急公好義中同治庚午並補行丁卯科副榜選授青州府訓導到任後見學舍傾圮歎曰學舍如此士嬉遊矣何由以資培養乃議修築慨然捐俸提倡復與邑紳勸募三年工竣進多士而磨勵之以敦品正誼爲本復立學規察驗從違以爲賞罰青州僻處山嶠猶恐所屬不能徧及乃令多立義塾每月公餘赴鄉里巡視進父老講論道德推崇慈孝由是羣知嚮學成材者衆三年大比鄉會中式者青州較他處獨多地方紳董呈請褒獎稱爲醇儒官青凡十年以疾回里老年家境稍裕自奉儉約而濟人不吝或

遇歲歉親族貧乏者周濟不遺餘力在官在家從學者接踵於路望而知之爲舉氏門人年七十三卒其從弟貢字禹廷廩貢生端謹仁厚積學不遇之士也子作霖字潤生恩貢生鴻臚寺序班陳毓芹字洙溪歲貢生候選訓導性情端正急公好義訓子有義方家况裕如光緒三年歲荐飢以糧助粥廠貧民沾其德惠鄉佃極貧者養贍之十年重修廟學竭力捐貲日必親往監視勞瘁不辭親族中之有志上進無力讀書者爲之批改詩文講勵如嚴師成材者日益衆其富而好禮如此子麟書象書孫嶧桐皆文學士而優行者也

江正誼字亦醇恩貢生家貧嗜讀教授生徒循循善誘成就者多自奉儉約留其餘以周濟貧乏每與戚族閒話所言皆孝義故事必使能心解力行而後已人有善力爲贊揚有過力爲規勸遇有婚喪之事尤力爲籌畫使之儉而中禮故人皆敬重之斯可稱爲一鄉之善士矣

李祕書字芸閣少失恃事父與繼母以孝聞叔父早世無子因兼承焉家甚貧供給維艱弱冠舌耕梓里得貲分贍兩父母常恐仰事弗周愉色婉容能得兩父母歡心幼嗜讀書長博通經史能文章氣量淵涵教子皆有法度中年貢成均淡於榮利謝舉子業日爲生徒講解羣書雖盛暑嚴寒無少輟晚年患目疾猶瞑目爲諸生說經於箋註無一錯訛如展卷目覩者然親炙者皆稱述而樂道之居鄉恂恂樂稱人善從無疾言厲色雖鄉曲桀驁之人見之無不起敬著有啓蒙詩文藏於家長子鋒優廩生次子鐸光緒壬午

舉人另有傳季子銑乙酉拔貢辛卯順天舉人并研縣知縣均謹
守家教有父風

李衍綬字嵩屏咸豐初從軍湖廣以功洊保貳尹衍綬負大志以丞
不足爲也入貲爲縣令同治六年除知雲南之嶧峨時滇事方棘
巡撫都御史岑毓英駐軍曲靖一見卽以邊才目之及到官招撫
流亡練土兵作防守計以故邊南皆麻亂嶧峨獨完擢巧家同知
署石屏收石屏羅兵燹久豪強愍不畏法有趙有幅者以練目積
功至偏裨貪暴恣橫所部皆勁卒將謀不軌毓英知衍綬才使圖
之衍綬單騎至州陽示懦弱狀夜引壯士伏官廨中擇日爲衣冠
會邀有幅至解甲歡飲舉箸伏發斃之堂下其黨與遂鳥獸散自
元江以西郡邑皆相慶更生而衍綬威聲亦大震官石屏二年治

德縣志

卷十

人物志 耆英

六十八

行推滇省第一考績擢臨安太守賞戴花翎晉三品銜東川歲荒
衍綬率僚佐巡行鄉邑賑飢民全活者甚衆未幾遷大理府丁母
憂歸適法蘭西與越南構禍滇帥劉長佑以衍綬知兵奏調赴邊
防衍綬遂再入滇隨軍出關贊畫悉協機宜甫一月染瘴還抵省
卒督撫以聞朝廷憫其勤勞卹贈太常寺卿廕一子知縣衍綬果
毅有幹略膽識過人居官廉介自持爲大吏所重不十年自邑令
超至五馬歷典大郡所至皆有聲實堪稱循良之選矣子曰謙字
葆初廕生另有傳

徐象震字純生性巽才高博通經史尤嗜讀諸子百家以及方技釋
老之類昕夕研窮雖盛夏隆冬弗輟也彊記憶能過目不忘隨意
拈僻事卽以某書某卷對絕無誤者生平寡言笑與儕輩處常默

然與之論古則神采騰涌疊疊無倦容然不問不發也文以漢魏爲宗不規規於唐宋八家而氣息沈實獨標真諦沈雲巢周福皆匡鶴泉丁穉璜諸名宿尤鑒賞之同治癸酉舉於鄉光緒庚辰成進士授沂州府教授洎任未久陳雋丞撫帥聘訓其子一經裁成厥後陳得擢巍科入詞林蜚聲翰苑發其緒餘遂使弟子成名平日作文甫脫稿人爭傳誦洵可謂握靈蛇之珠抱荆山之璞者矣惟官運屯蹇文亦多散佚士林惜之

李 鏞字欽之號拙軒性至孝沈靜好讀書幼時授以朱子小學卽以聖賢自期每坐身容必端儼如成人爲文沈實雅正光緒丙子副榜壬午舉於鄉喜讀朱子全書五子近思錄尤好陸宣公范文正王文成等集以爲有經濟乃有真學問創建宗祠獨力監修六

德縣志

卷十

人物志

耆英

六十九

赴春官不第選泗水縣教諭教授生徒如家人父子誘掖不憚煩瑣遊其門者多爲文壇健將父兄病侍湯藥滌廁膾必親身操作不肯假諸僕輩中年傷足不良於行延及全體疲痿是時母患癱疾猶強行至母前告以病愈勿念回室而歿著有文稿藏於家

田 致字和卿山薑先生後裔幼學文於徐純生筆下軼宕不羣以成弘爲根柢饒有管周胎息入庠後優等補增力勤舉業錚錚有聲馬葛村戎部喜其精理爲文秀氣成采許爲翰苑之才天不永年士林惜之弟敷字學山邑之明經家學淵源氣概曉鬯自科試停止曾佐戎幕晚年與修志事探討精深尤盡心力咸推重焉

呂青雲字瑞瞻晚號問道山人崇修孫性情敏捷學識宏通飫承兩代庭訓兼受學於馬葛村先生髫齡入泮逾年歲試父領批子副

之學使趙太僕佑宸尤垂青焉光緒乙酉以選拔貢成均文以名
大家爲宗高華沈實兩兼之矣尙結納談論風生動驚四座具有
管公明康伯淵之概十三年重修廟學州侯程公約董其事朝夕
巡察工稱堅美嗣於地方公益無役不從監理州衛書院多年增
膏獎添器具培植多士其用心亦良苦矣尋興辦新政書院改設
學校仍任該校監督遵章籌辦靡不井井士林至今稱之好吟詠
稿多散佚所著桑梓見聞錄邑中掌故賴以徵信尤具卓識焉

李肇華字梅菴增貢生候選州判性慷慨見義勇爲村居西河之湄
咸同時代髮捻等匪相繼橫行州侯倡辦團練令肇華督率正西
兩堡練勇沿河防禦肇華悉心籌畫力爲保障匪衆偵知有備遂
由城東繞道至桑園連鎮一帶未敢擾及河西地方捍衛鄉里肇

德縣志

卷十

人物志

耆英

七十

華懋厥功焉事後以軍功得叙州同子汝玫庠生汝琦廩生孫衷
恪廩生衷愷歲貢生候選訓導

田毓珩字雲石號鎮楚高才碩學尙氣節能文章而性方鯁不與俗
諧光緒乙亥舉於鄉壬辰春闈中式以未殿試例稱貢士焉志氣
高尚不屑仕進見宦途積弊日深每多憤懣凡結納營私希圖進
取者一語揭之若將浼焉與督糧道尙其亨爲會榜同年屢次延
請擬聘主講繁露書院不得已到署一見未及終席而歸其清高
狷介之行類如此先是家頗饒裕慷慨好施遂致中衰晚年稍困
藉授生徒以自給然其培寒峻勵才能助膏火却脩脯竭其心力
財力無德色倦容老而彌篤論者比於曾皙牧皮庶幾得其髣髴
歟年七十有六卒於家

李道一字貫之附貢生真誠不欺樂善不倦家富饒而衣冠樸素日赴村鎮講演鼎甲徵信錄宣講拾遺等書勸人敬祖孝親敦宗睦鄰援古證今化導愚騃並施藥品以療人疾埋枯骨使勿暴露行之數十年雖風雪寒暑無間也好善之名博於遐邇年近期頤五世同居鄉人至今稱之子觀光歲貢生觀瀛恩貢生孫鴻林歲貢生泮林庠生皆克守家教

顏振宗字光裔性淡泊而樂善好施不倦宅近水官驛驛有粥廠光緒初黃河頻年決溢貧民來德就食無所棲止振宗騰房以居之有因風雨疾病不能出而乞食者則爲備餼糧儲藥餌往往親爲煮藥死且爲備棺木焉先是祖遺田二百畝宅一區並有樹木多株因多數慨施漸漸入不敷出更爲鬻田以行之又數年子死且乏嗣仍力行不輟或問之則曰吾見人之困苦甚於己之困苦吾亦行吾心之所安而已豈爲徼福哉由是名聞遠近咸稱之曰顏善人

德縣志

卷十

人物志

耆英

七十一

呂喬齡字壽菴占霖曾孫廩貢生候選訓導孝友仁厚平生無疾言遽色好讀書多見聞尤多識掌故談論時有揮塵風生之概少習舉業五戰未售因淡於仕進居家奉親三事繼母曲意承歡怡然無少違忤鄉黨以閔子老萊比之庶母弟遐齡年幼冲旣失怙而又失恃加意教養食必與俱出必與偕備極愛護同居二十餘年式好無猶分爨時田產什物任其自擇一無所較友愛之心篤矣孝悌兼盡晚近鮮能及之孫大澂字晴川附生頗能繼祖志焉張耀銘字禮亭附貢生納貲爲中書科中書急公好義事繼母以孝

聞教子弟以義方聘名宿趙掄秋先生爲師使子弟受學焉光緒十一年秋衛河由城北決口附近盡成澤國後河水低落而外溢之水反高於河中耀銘倡議開通老河頭舊堤引水入河以資播麥衆言河堤一開恐明年洪水冲刷儻新堤潰決誰任其咎耀銘甘其賠修之結衆如其言次年汛期無恙二秋俱登咸感公誼欲製匾額頌之耀銘固卻之曰偶然耳豈敢邀譽於鄉黨哉事遂寢歲丁酉長子書元字鳳卿取州學拔貢次子際辰字秀岑取衛學拔貢兄弟踞州衛同選者僅張氏而已書元以直隸州州判升用知州需次山西際辰署登州府教授語云種德者食報信然

趙秀嶺字瀛洲漢崇先生之從姪好古敏求博通經史弱冠蜚聲庠序爲李兩巖太史高足後從馬葛村戎部遊許爲翰苑奇才一時

德縣志

卷十

人物志

耆英

七十二

遊葛村之門者推秀嶺爲巨擘葛村使其子師事之然阨於命運十試秋闈備中兩次終未獲售行年五十乃曰吾知天命矣遂將平生所作詩文盡焚其稿自是絕口不談文藝日與田夫野老話桑麻事有請業者則婉言謝絕後以歲貢授教職竟不謁選亦陶靖節之流亞歟

陳子炬字少卿號夢蓮大業子廩貢生候選訓導幼從其叔荔村先生讀刻苦自勵力求有用之學比長講學之餘兼綜家政以孝悌爲修身齊家之本以勤儉爲治事用財之本以能忍爲待人接物之本風度巋然猶見先民矩矱宣統初實行地方自治子炬以德望被舉爲縣議會正議長事屬創舉極爲繁劇子炬措之裕如平生善書嗜詩最愛菊藝植滿園嘗持酒手陶詩且賞且讀以爲人

間之樂無踰此也年八十餘卒子以墻字確齋歲貢生候選訓導
孫銘鼎字恭三山東省議會議員

宋良貴字德卿廩膳生博學好古詩尤雋雅性孝友和平一生與人
無忤因居宅爲車站拓據遂與兄弟析居相讓無爭天倫敦睦有
古君子之風焉

陳德興字敬之廩貢生同治間隨同辦理團練堵禦捻匪以軍功保
教職補充兗州府學訓導教養士子不振文風光緒乙酉學使汪柳
門察其才能堪膺民社保知縣在任候升選授山西平鄉縣到任
後力崇清儉案無留牘分期巡視各鄉輕騎減從遇事協同紳耆
卽爲訊結不延滯不株連民心悅服復以頻年荒旱飢民待哺嗷
嗷廼發倉穀賑之民懷樂利晉撫張汝梅劾以擅發倉廩遂去官

德縣志 卷十 人物志 耆英

旋里後被推爲商會會長藉以終老云

李椿字壽山星門先生後裔歲貢生候選訓導端謹仁恕矩步方
行一遵古道兄弟同居數十年怡怡無間言孝悌之行人謂其能
繼先德焉教授生徒以忠孝爲本誘掖獎進多所成就居鄉恂恂
有長者之風子海瀛字仙洲附生陸軍軍官學校畢業歷充參謀
營長等職保至陸軍步兵上校

劉百祿字子荷少負奇才磊落不羈不屑爲寒酸措大出而學陶朱
於城西運河東濬工算法善辭令高談雄辯能令四座皆驚慷慨
激昂間有豪俠氣視齷齪之輩蔑如也屢辦善舉爲歷任邑侯及
各鄉先生所推許馬葛村戎部尤器重之邑中每有公益事必與
之商以其所蘊蓄者宏也如治河施賑團練積穀諸端必推之爲

首選百祿亦毅然任之而有餘勤勞於地方公事者垂三十餘年
歲逾六旬而精神躍躍不減少時光緒庚子拳匪肇釁京津變起
德邑當南北要衝散卒游勇紛至沓來尙觀察其亨邀其襄辦城
防規畫悉協機宜事後以病長逝豪士不遇古今同慨

張明經字紹文世居留智廟鎮忠誠孝友善書能詩幼年喪父居家
奉母不出色養兼盡者五十餘年如一日仿之老萊不爲過也母
壽八十餘無疾而終明經喪盡其禮祭盡其誠每至令節雖風雨
必親墓祭洵可謂孝思不匱者矣光緒庚子拳匪亂起京津騷動
該鎮爲直魯交衝之區悍匪潰卒紛至沓來遠近居民不勝驚擾
明經任該鎮保甲局局長編練民團指揮教導率衆梭巡一方賴
之以安鄉里咸頌其功德焉著有師竹草堂詩集稿藏於家子德

德縣志

卷十

人物志

耆英

七十四

昌從戎有年以軍功保至騎兵上校並加陸軍少將銜人稱孝義
之報云

武文源字西崑附貢生村居篤馬河畔同治間率鄉勇堵捻匪事定
以軍功歷保通判分發四川候補光緒初川邊苗酋勾結土民騷
擾邊境劉制軍派文源前往查辦遂輕騎身入重地開誠布公勸
導有方苗民感悟情願受撫息兵制軍嘉其勞績委署打箭爐撫
民同知並加道銜嗣告歸終於家

盧鳳翽字雲軒德水先生後裔天資高峻倜儻不羈經史一覽輒通
受學於徐純生進士文筆超逸不同凡響以患腿疾遂絕意進取
日兀坐一室之中精研詩詞雖簞食屢空晏如也著有雲軒遺詩
稿藏於家

李曰謙字葆初臨安太守嵩屏子也忠勇多智捕盜有父風以廕選授宜山縣宜山幅員遼濶山深箐密盜賊紛如以差役團丁不足恃乃捐廉募勇親率緝捕蒞任二年在署不過八九月賠累約逾三千金嗣調署懷集縣懷集故多匪號難治募勇剿匪一如治宜山閱八月匪息民安懷人爲建生祠以祀之未幾又調蒼梧縣歷任捕獲元惡巨匪七百餘名其餘正法軍前者無算以廉明果毅擢鬱林州牧尋陞柳州府知府並統領柳防三營凡戰必身先士卒所向克捷功烈卓著南服稱最尤精岐黃謁選時名達帝所景帝屢召診嘗以良醫獎之罷官後僑寓襄陽嘯傲湖山猶手不釋卷著有藥言隨筆四卷行世

耶春舒字荔軒歲貢生博學好古多識邑中掌故著有德境疆域志

德縣志

卷十

人物志

耆英

七十五

河圖考清光緒丙申歲州侯錢松生奉文徵求志稿春舒多所贊助云

李培麟字雲符廩貢生翰林院待詔性沈毅勇決樂善不倦凡事之屬於公益者必毅然任之雖艱鉅弗顧也世居城北北廠地處衝要若義渡河堤學校粥廠等事其興辦與否皆於地方有休戚之關培麟靡不首爲提倡竭力進行以底於成監管粥廠四十餘年處之以公勞怨不辭好義之心老而彌篤鄉里咸稱頌焉

民國

魏壽彤字仲鶴號悔癡又號夢夢生藿村後裔清歲貢生候選訓導天性孝友學問淵博地方有公議大事皆本經術以出之無不井井有條詩古文詞眞摯風韻脫盡恒蹊一代著作才也與兄壽彭

砥礪名節以風雅道義相切劘壽彭字述之清庠生博稽羣書長於天文術數之學邑內有大建築多主持之著有漁山詩草兄弟一堂雍穆令人深棠棣之思光緒丙申歲山東通志局徵稿壽彤應邑侯錢公聘分纂德州志略舉要壬寅歲復應邑侯聘主修德州疆域圖考並撰著鄉土志八卷邑中掌故賴以徵信此次修志多所採選焉宣統紀元勵行新政當選爲山東諮議局議員時撫憲以軍需虧累甚鉅擬提各縣公款彌補壽彤建議力阻之本邑各款賴以保存並議免各縣差徭民困稍蘇至若居鄉之時辦理水會粥廠惜字社埋骨會施棺局各善舉靡不首先倡導而監管安懷所恤養院以及鄉賢節孝兩祠尤拳拳盡力焉其事親疾與其兄衣不解帶藥必親嘗數月無倦容兄歿事寡嫂禮儀罔缺晚

德縣志

卷十

人物志

耆英

七十六

歲不問世事閉戶家居蕭然塵壒之外曾自署楹聯云盤桓松徑陶元亮坐臥藜牀管幼安嘗曰人生若夢故自號夢夢生時與二三知己談今道古愉愉如也生平書翰最工人爭寶之年七十二而卒著有詩文集一卷友譜八卷藏於家

趙桂嶺字蔭秋漢崇先生之從姪性孝友仁厚九歲喪母哀毀如成人人事父能竭力父有疾朝夕侍左右雖至厠踰親滌無間事繼母以孝聞清光緒中由附貢保鴻臚寺序班轉縣丞指分河南瀕行繼母病遂不赴晝夜侍側親嘗湯藥衣不解帶者累月及病革喪葬盡禮以繼母弟年幼冲需教養遂絕意仕進前母長兄已斑白又孱羸仲兄早世故一切家政獨力操持兄弟同居數十年內外無間言里有貧窘者輒周濟之不少吝有紛爭者得其一言而釋

邑侯楊公聞其賢宣統元年預備立憲詔令各省徵辟各州縣明達士紳一二人詣省研究自治保爲自治研究員旋里後常延至署與之討論政治舉凡關於自治者如學校農林交通衛生諸端建議靡不收效焉平生急公好義和藹近人其於公益也以人民爲念其於社交也以禮義相砥其於戚族也以仁讓自持熙熙穆穆有薛包黃憲之風同邑魏仲鶴盧崇臺素與友善每過從談論以齊家處世之道互相淬礪民國六年以積勞病歿鄉人感其行誼公送匾額題曰一鄉矜式用誌儀型云子廷瑞字鳳岑附生頗能繼父志焉

杜濬川字濟臣逢春後裔附貢生中書科中書候選訓導資稟穎異博覽羣書性理醫數諸學尤具心得以父兄早世居家奉母絕意

德縣志

卷十

人物志

耆英

七十七

進取事寡嫂如母爲之請旌建坊兄女嫠而貧極憫恤之及其卒也復爲置產立嗣天性孝友良如是也族戚中貧不能自贍者按時周卹婚喪大故盡情資助履數十年而無德容嘗曰寧損己以利人終較仰給於人之爲愈也民國九年歲凶荒發藏粟貸於貧困全活甚衆有欲賣產求食者輒與厚價令作質以備珠還故鄉人至今稱厚德焉卹居瀕運河西泔堤埝坍塌潰決堪虞乃相度地勢自出鉅貲建甌壩三以防汎患縣北及篠南一帶得免漂溺尤爲人所稱仰事聞於徐大總統獎以行冠州閭匾額并予褒辭褒章膠縣柯劭忞先生爲撰墓誌云陸姻任卹之誼足以當之非虛譽也長子惟勤字勵堂試用縣丞早卒次惟儉字助廉附生直隸高等師範畢業就長山東第三師範學校旋被選爲衆議院議

員簡任職存記後復當選爲山東省議會議員歷充交通部秘書
歷城縣知事等職

劉琦字亦韓清庠生援例爲鴻臚寺序班性儉約好施與光緒癸卯歲與邑人鄒尙質各出京蚨萬緡於藥王廟內剏設粥廠每日蒞廠監視施放雖風雪凜冽無間也民國六年運河決口粥廠房舍漂沒無遺而被水災民尤多待哺遂遷於南關馬神廟繼續施粥全活甚衆復於宣講所內添設施診施藥施棺各善舉並設立惜字埋骨救火等會行之數十年勤勞罔懈可稱爲樂善好施者矣

呂鼎元字新甫筠浦先生姪孫清歲貢生候選訓導性厓岸與世落落寡合文章則鎔經鑄史居然名家受學於馬葛村戎部最器重

德縣志

卷十

人物志

耆英

七十八

之然困於棘闈屢薦未售遂淡於名場教授生徒善能起發後進成就者衆與其堂兄順甫始終同居怡怡無間言友于之心老而彌篤卒年八十有七

鄭麟之字紱廷清歲貢生世居蔡村耕讀傳家雖無出爲顯宦者而世守書香勿替至麟之尤爲謹飭閉門訓子不預外事以明經終老云

金連科字占一清歲貢生少負奇才年未弱冠卽遊泮水爲徐純生進士高弟應試秋闈屢薦未售遂肆力岐黃之術得盧扁堂奧遊於京濟踵門求醫者絡繹於途晚歲家居遇有疑難大症無不應手奏效鄉里至今稱之弟連墀外交部僉事山東高密縣縣長子挺華牟平縣縣長

李澤棠字惠南清歲貢生端謹仁厚言行不苟事父母以孝聞好讀書嘗假諸儕輩日夜手抄寒暑無間爲文清真雅正歲科試輒冠其曹而棘闈屢困乃以其所學授生徒焉因材施教誘掖循循遊其門者多蜚聲庠序從學者日益衆生平溫恭自持與人無忤處兄弟雍雍怡怡篤盡友于之情晚歲患目疾猶瞑目爲子姪講解各經註疏一無錯訛學者至今每樂道之

謝應樞字佑宸清附貢生世居柘鎮性慷慨仁厚言必忠信行必篤敬恂恂以禮自防凡有公益必首先倡導尤好爲人排難解紛可謂一鄉之善士矣

盧中倫字仲言德水先生後裔性孝友慷慨襁褓喪父幾至失學稍長其從兄鳳翮許爲異才授以經傳與之講解輒樂而安倦最嗜

德縣志

卷十

人物志

耆英

七十九

讀其先人德水雅雨選著各集以爲家學之所在也生平志趣高尚淡於名場專詣力於詩古文詞以及金石書畫數術之學昕夕研窮具有心得事母曲意承歡每聞呼喚必攬鏡自照豫然而後進其能盡色養如此及母卒哀毀骨立喪葬盡禮每至今節祭先掃墓雖抱疾必親展以致誠敬其奉先思孝如此嗣以眷口日繁兄弟遂議析居田產什物相讓無爭平居博覽羣書不治家人生產惟吟詩藝菊以遣興遇戚族之貧乏者乞求必如其願無吝色德容其慷慨尙義又如此民國紀元地方舉辦自治當選爲縣議會議員落落與人寡合而建議多所獲效如興辦學校培築民埕堵修程莊決口諸端必兼籌並顧力維桑梓民國七年徐大總統徵集海內詩家遺稿編輯晚晴簃詩鈔中倫抄寄邑前賢遺詩一

册多獲採選其熱心公益闡揚耆德尤足稱焉後以內戰頻興杜門不出日課其子女吟詩彈棋以爲樂年五十七而卒遺有春草堂紅豆山房各詩稿待梓於家

董瑤林字瑞芝別號柳湖文波後裔爲邑名士田雲石先生高弟清宣統己酉拔貢博通經史善書能文而性方鯁狷介自持世不與諧而亦不樂與世諧也平生慕管幼安陶元亮之爲人淡泊自甘不樂仕進選拔後竟不赴朝考頻年授徒以自給亦一時隱君子也好飲酒曾不及醉最愛古硯常於舊書肆中求之獲名硯數方朝夕觀賞輪換磨墨日書端楷以自娛民國二十二年縣長李公倡修縣志聘爲副纂並分撰人物志稿是年冬猝得暴病功未竟而薨志歿惜哉

德縣志

卷十

人物志

耆英

八十

韓玉權字元森明代都督韓觀後裔原籍安徽含山縣清咸豐初從戎隸左文襄公麾下屢立戰功歷保至衛守備權選山東濟寧衛運糧千總以領運駐德遂家焉性情仁厚意志豪爽居官廉潔自持極爲上峯所信任重禮義好施與自奉儉約而遇人優厚戚族朋儕有急必力爲資助雖多金不稍吝尤篤於孝悌之行顧以父母早世迎養其叔父來德溫清罔缺且爲置產以贍其後嗣待遇原籍族衆無間親疎盡量調濟復推一本之誼繕宗祠修族譜立家塾需費萬金皆所獨出且置祭田以永祀先靈更捐學田以佑啓後輩較古之仲淹捐金士謙遺惠有過之無不及矣至於斯地義舉亦靡不樂予援助光緒十一年運河東岸老虎倉決口被推監修河工昕夕指導勞怨不辭至今堤岸隆隆異常堅固數十年

所以無潰決之虞者玉權之功也其急公好義類如此晚年好善彌篤出親友積年貸欸券契盡行焚燬復集子孫而告之曰吾非市義不過去人贅累使圖自立耳汝輩切存忠厚勿津津於齒頰間致人於難堪也其輕財尙義又如此子承琦字魏堂直隸候補知州嗣調黑龍江省委縮離務多所建樹好義有父風民國九年歲荐饑自捐紅糧百石復四方勸募數百斛送入粥廠施放之期賴以延長貧民備霑德惠遠近稱頌不置焉事聞於徐大總統獎以急公好義匾額

徐寶鉞字紹青津門望族以父兄需次督糧道轅寓德年久置廬墓焉少遊趙掄秋先生之門深獲器重嗣援例捐佐職亦分儲轅聽鼓性豪邁好慈善淡於利祿不喜結納權要惟以樸素自勵戚族

德縣志

卷十

人物志

耆英

八十一

之顯貴者皆不與之通欸曲清光緒辛丑歲奉委解庚子第一次償欸赴滬因滬道署吏胥多方刁難憤懣成疾自是絕意仕進閉戶潛修雖簞食屢空晏如也民國甲子德縣紅卍字分會成立被推爲會長董理會務誠篤不懈凡德碩望重者皆援引入會共圖策進適值軍事繁興從事救濟工作收容婦孺治療傷兵晝夜巡察勞瘁不辭丁卯歲歉山東賑務處聘爲西北區調查專員獲與奉吉黑熱四省慈善會會長楊子功君接洽寶鉞極陳德邑災况得賑紅糧二千五百餘石遂協同當地官紳查明城關及四境災况之輕重定給賑糧之多寡並撥助各粥廠以延長施放之期一時貧民賴以全活遐邇至今稱盛德焉嘗以會無定址爲念見東嶽龍神兩廟坍塌不堪力請當軸撥爲會基乃以積勞致疾未及

修建卽病篤當彌留時諄諄以此爲囑並不道及家事其致力於
慈善事業可謂始終盡瘁者矣子思詠隨辦會務有年恪遵遺訓
聯合同志卒將兩廟修葺以爲會址得竟其先志云

按舊例僑寓者逾六十年以入籍論韓徐二君居斯地皆過三
世以上其德業足爲閭里所矜式特著之以爲世勸

卷十刊誤表

頁數	行數	字數	誤	正	原文
三	十一	二	簿	薄	奉祿微薄
三	十六	十	亦	以	必以自慰
三	十七	二十	襟	襟	襟屏風殿
五	十	十三	褒	褒	手詔褒美
五	十一	七	敷	敷	敷歷中外
十四	十五	四	訶	訶	訶事人
十八	三	十二	酉	丑	順治辛丑進士
二十三	一	三	姿	幼	幼穎悟
二十六	六	九	綱	綱	鐵網珊瑚
二十七	十	二十	仕	仕	致仕歸
三十四	十二	十二	汎	汎	二僻汎
三十六	十四	十三	盧	盧	盧世灌
三十八	五	二十五	多一(號)字 下落一號字	刪去 添一(號)字	寄之於毫素間 故賜之名號云
四十四	十	十六	兩	雨	雅雨蒙泉而後
四十九	七	十二	蔓	漫	漫野叢林
四十九	十三	八	屨	屨	屨獲鄰封要犯
五十二	四	二十五	洵洵	恂恂	恂恂有儒者氣象
五十四	二十一	十七	倡	唱	詩酒唱酬
五十八	十三	十五	歛	斂	雲斂風息
六十九	八	四	歛	斂	字斂之
七十四	六	十七	仿	方	方之老萊
七十九	十一	二十二	妄	忘	輒樂而忘倦

